

重校刻平津館叢書

第

集



立政第廿四 周書十五 尙書今古文注疏卷廿四

賜進士及第授通奉大夫山東督糧道加三級孫星衍撰

**注**史遷說周之官政未次序於是周公作周官官別其

宜作立政以便百姓百姓說**疏**史公說見魯世家云以

姓百官也  
見堯典疏

周公若曰拜手稽首告嗣天子王矣**疏**史記周本紀云

成王長周公反政成王北面就羣臣之位魯世家云成

王長能聽政於是周公乃還政於成王成王臨朝又云

北面就臣位鞠躬如畏然是用咸戒于王曰王左右常

說此經拜手稽首之義也

**伯准**伯一作敝常任準人**注**準一作辟綴衣虎賁**疏**成

者

釋詁云皆也史說言周公就羣臣之位故與羣臣皆告

戒於王常伯者文選藉田賦注引應劭漢官儀云侍中

周成王常伯任侍中殿下稱制則常伯於漢為侍中百

官表侍中中常侍皆加官無員多至數十人得入禁中

注應劭曰入侍天子故曰侍中古文苑載胡廣侍中箴

云亦惟先正克慎左右常伯常任實為政首據此則常

任亦為侍中之職準人江氏聲云即下文文武時之準

書疏廿四

故云迨也引周書曰常故常在此孔壁古文迨之訓蓋  
字詁非經義也王氏鳴盛以迨爲迫近之義或然準熹  
平石經作辟下闕蓋 周公曰嗚呼休茲知恤鮮哉疏釋  
作辟人謂法官也 古之人迪惟有夏乃有室大

言美此近臣知憂者少也 大競顓俊尊上帝迪知忱恂于九德之行疏 迪者釋詁

室猶云有家謂卿大夫也競者釋言云彊也詩烈文云  
無競惟人傳云競彊箋云人君爲政無彊于得賢人者

顓者說文云呼也俊者釋言云髦也忱者詩傳云誠也  
恂者釋詁云信也九德皋陶謨云亦行有九德言古之

人有道者惟夏王時其巨室多賢其君招呼賢俊以尊  
事上訓爲遜迪卽由字由遜也亦語詞釋詁遜由

字當訓爲遜迪卽由字由遜也亦語詞釋詁遜由  
皆訓自迪惟有夏猶云遜惟有夏也下迪知同 乃敢

告厥后曰拜手稽首后矣曰宅乃事宅乃牧疏 鄭康成

曰殷之州牧曰伯虞夏及周曰牧宅乃準茲惟后矣謀

書疏廿四

面用丕訓德注 謀面一作亂謀面則乃宅人茲乃三宅

無義民疏 宅者釋言云居也亦與度通事謂三事大夫

謀面者周書官人解有考言觀色訓與順通丕大也義  
民王氏念孫云邪民說文俄行頃也廣雅釋詁云俄衰

也學記蛾子時術之卽蟻子也古字俄義同聲言旣誠  
信所知之人有九德之行乃敢拜手稽首以告其君曰

居乃職事之人居乃作牧之人居乃平法之人茲乃在  
我后矣察其言觀其色用大順德之人乃以官居人此

乃職事作牧平法之人皆無邪民矣鄭注見書疏云殷  
之州牧曰伯虞夏及周曰牧者曲禮云九州之長曰

牧王制云千里之外設方伯八州八伯白虎通封公侯  
篇云州伯何謂也伯長也唐虞謂之牧者曰尚質使大

夫往來牧諸侯是也謀面熹平石經作亂 桀德惟乃弗

謀面言臣治其謀猷君面用大訓德也 桀德惟乃弗

作往任是惟暴德罔後

**疏**任者韋昭注周語云職也暴者說文云疾也罔無也桀之

為德惟乃弗為往昔先王任人之道是惟暴虐為德不顧其後亦越成湯陟丕釐上帝

之耿命乃用三有宅克即宅曰三有俊克即俊嚴惟丕

式克用三宅三俊其在商邑用協于厥邑其在四方用

丕式見德

**疏**越同粵釋詁云于也丕語詞陟同勅泉陶謨勅天之命史記作陟釐者詩箋云理也

耿者說文引杜林說光也三宅江氏聲云事牧準也即

者詩傳云就也三俊即三英詩羔裘云三英絜兮傳云

三英之德也箋云三德剛克柔克正直也武者釋言云

用也協者釋詁云和也言亦于成湯能勅理天之光命

乃用事牧準三宅之官能就其所居之位言稱職舉三

德之俊能就其俊德言不失實惟嚴以用人能用三宅

三俊其在京邑以和于其邑嗚呼其在受德啟

其在四方以能用人見其德

馬融

書疏廿四

三

曰受德受所為德也啟一作恣

**疏**受德者周書克殷解云殷末孫受德孔晁

注云紂字受德呂氏春秋當務篇云紂之同母三人長

曰微子啓其次曰中衍其次曰受德受德乃紂也啟者

釋詁云強也馬注見釋文以受德為受所為德者西伯

戡黎序云弃告于受是紂亦單稱為受上文言桀德則此

受德亦可言受之德也啟說文作恣惟羞刑暴德之人

云疆也周書曰在受德恣讀若旻

同于厥邦乃惟庶習逸德之人同于厥政

**疏**羞者釋詁云進也暴者說文云疾也庶者釋詁云眾也習者釋詁云狎習也

習亦為狎逸者漢書韋賢傳注臣瓚曰放也言惟進用刑殺暴虐為德之人與之治國乃帝欽罰之乃俘我有

夏式商受命奄甸萬姓

**疏**欽與厥通釋詁云與也俘與

云中國之人也式者釋言云用也奄者說文云大有餘也甸者詩傳云治也言天與罰紂罪乃使我有中國之

人用受商之大命大治萬民亦越文王武王克知三有宅心灼見三

有俊心注灼一作焯俊一作會以敬事上帝立民長伯

疏灼者廣雅釋訓云灼灼明也伯者釋詁云長也言亦至于文王武王能知事收準人之心明見三德俊士

之心以敬事上天立明長上灼說文作焯焯云明也引周書焯見三有俊心俊熹平石經作會今文與古文異也

釋詁云會合也言明見三立政任人準夫牧作三事虎宅之合干心者始用之

賁綴衣趣馬小尹左右攜僕百司庶府大都小伯藝人

表臣百司大史尹伯庶常吉士司徒司馬司空亞旅疏

立政任人言文武立政以任人也準夫牧作三事即上文宅乃事宅乃牧宅乃準之倒文三事見詩十月之交

云三事大夫箋云三公此似總下衆官大小言之也虎賁綴衣見前疏孟子盡心篇趙注引書云虎賁贅衣趣

青疏廿四

四

馬小尹趣馬見詩雲漢傳云歲凶年穀不登則趣馬不秣江氏聲云虎賁趣馬千周禮為校人屬馬一十二匹

立趣馬一人掌贊正良馬而齊其飲食小尹即圍師之類趣馬即下士馬一匹有圍師一人也左右攜僕蓋若

周禮太僕射人也鄭注周禮射人云射人與僕人俱掌王之朝位也檀弓曰扶君下人師扶右射人師扶左注

云小當為僕聲之誤也僕人射人皆平生時贊正君服位者然則此文左右攜僕正當彼二官之職也王氏鳴

盛云左右攜持器物之僕謂寺人內小臣等也百司庶府江氏云若曲禮云天子之六府曰司土司木司水司

草司器司黃是也周禮則官名言司者尤多府則有太府玉府內府外府泉府天府之屬言百言庶皆凡括諸

官之詞也王氏云百官有司之下主券契府藏之吏謂其下賤人非百官有司之身也江氏又云百司兩見者

蓋內外臣之別與表臣百司表之言外是外百司也太都小伯者大都邑之小長謂公卿都邑之內大夫及邑

宰之屬以身有道藝故云藝人大史者周禮大史下大夫二人掌建邦之六典所掌事重故特言其官名尹伯

長官大夫周禮每官皆有長若太史爲史官之長大司樂爲樂官之長如此類皆是也庶常吉士王氏云衆掌常事之善士蓋士爲長官者其大夫及士不爲長官者則前云百司也司徒司馬司空則周禮六卿之三也曲禮云天子之五官曰司徒司馬司空司士司寇鄭注以爲殷制然則殷紂時天子五官文武時爲諸侯降于天子故三官亞旅者亞次也謂其副貳官名異於周禮者蓋稱名之異非設官之名如月令之有太尉大首緯書之舜爲太尉不必夷微盧烝三毫阪尹注鄭康成曰三虞周有此官名也

毫者湯舊都之民服文王者分爲三邑其長居險故云

阪尹蓋東成皋南轅轅西降谷也

**疏**烝者釋詁云君也微盧見牧誓書疏

云此舉夷微盧以見彭濮等諸夷也鄭注見書疏三毫者見詩元鳥疏云湯舊都之民服文王者分爲三邑者毫爲湯都以其時商紂暴虐而服于文王以言三毫故知分爲三邑也云其長居險故曰阪尹者阪是山陂之

書疏廿四

五

名尹是正長之稱既分毫爲三邑自必各爲立長其長稱阪尹以居峻險處也云東成皋南轅轅西降谷者地理志云成皋故虎牢或曰制春秋左氏隱元年傳云制巖邑也則成皋險矣國策張儀曰塞轅轅緱氏之口則轅轅亦險水經穀水注云草澗水出新安縣東南流經母邱與盛墓東又南經函谷關西關高險路出塵郭漢元鼎三年樓船將軍楊僕數有大功恥居關外請以家童七百人築塞徙關于新安卽此處也然則新安之函谷亦險函降聲相近鄭氏所言降谷必是此也江氏聲云鄭氏以毫邑北臨大河故于其東西南三面推求而以成皋轅轅降谷當三毫阪險之處蓋者以無明文左證故也皇甫謐說三毫以蒙爲北毫穀熟爲南毫偃師爲西毫不可信也

文王惟克厥宅心

**注**

一無克字宅作度乃克

立茲常事司牧人以克俊有德文王罔攸兼于庶言

**疏**

常事司牧人最括上文之官任人以下至亞旅也以者說文云用也言文王惟能內度其心乃能立此常事司

牧人以能得俊有德者文王無所兼聽衆言言謂毀譽之言也漢書季布傳布曰陛下以一人譽名臣一人毀去臣臣恐天下有識者聞之有以窺陛下是庶言之不可兼聽也惟克厥宅心熹平石經作維厥度心宅與度經通用詩皇矣云帝度其庶獄庶慎惟有司之牧夫是心傳云心能制義曰度

訓用違庶獄庶慎文王罔敢知于茲疏訓與順通庶獄庶慎言諸獄事

衆當慎之惟責成于有司及牧民之人是順是違凡諸獄事由衆慎之文王無敢與知于此法者天下之平君欲知之必有承望意旨以爲輕重者康誥云勿庸以卽汝封又云未其有若汝封之心亦文王不敢與知之義也庶獄庶慎僞傳以爲衆刑獄衆所當慎之事非也下文稱蘇公式敬爾由獄又云茲式有慎故知慎卽慎獄也亦越武王率惟敕功不敢替厥義德率惟謀從容德

以並受此丕丕基注此一作茲基一作其疏率與吹通語詞毛詩

書疏廿四

六

作聿牧者鄭注周禮云安也功者詩傳云事也從者鄭注禮記云順也容者廣雅釋詁云寬也言亦于武王聿惟安其事不敢廢其義德聿惟謀順注鳴呼注一作於戲文王寬容之德以並受此大業也

孺子王矣繼自今我其立政立事準人牧夫我其克灼

知厥若丕乃俾亂相我受民和我庶獄庶慎疏若者釋詁云善

也丕語詞亂者釋詁云治也言孺子今爲王矣繼自今我其立政當效法文武于立事準人牧夫之三宅我其能明知其善乃使之治政以助我受民以和注我諸獄衆慎之事鳴呼熹平石經作於戲時則勿有

間之注勿一作物自一話一言我則末惟成德之彥以

又我受民注間者說文云隙也末者孔晁注周書云終彥者釋訓云美土爲彥話者釋詁云言也

說文云會合善言也又與艾通釋詁云相也言是旣明知厥善則勿有間之者自一話一言我則終思成德之

美士以相助我受民也論衡用零篇勿作物云周公爲成王陳立政之言曰時則物有間之自一語一言我則未維成德之彥以又我受民周公立政可謂得矣知非常之物不賡不至故敕成王自一語一言政事無非毋敢變易然則非常之變無妄之氣間而至也水氣間堯旱氣間湯周宣以賢遭遇久旱政無細非旱猶有氣間之聖主知之不改政行轉穀賑贍損豐濟耗斯見之審明所以救赴之者得宜也段氏玉裁云此今文尙書也詳仲任意於末字絕句末無也謂無非也不賡不至當作不賡不去謂去非常之災異也

已受人之微言注一作旦以前人之微言咸告孺子王

矣疏微者詩傳云美也受人之微言熹平石經作前人

之微言者漢書藝文志云孔子沒而微言絕矣選注引論語崇爵讖曰子夏等六十四人共撰仲尼微言微與嫩聲義相近嫩言亦美言也

繼自今文子文孫其勿誤于庶獄庶慎惟正是之疏正治獄之官周

書疏廿四

七

書嘗麥解云王命大正正刑書言繼自今守文之子孫其勿誤于諸獄衆慎之事惟大正是治之獄者萬民之命故周公以立政告王獨於庶獄庶慎之事反覆致戒篇中又呼可寇蘇公而告之仁厚之至也

自古商人亦越我周文王立政立事牧夫準人則克宅之克

由繹之茲乃俾乂國疏由者釋詁云用也繹與敦通說文云終也言自古商王亦于我

周文王其立政也於立政牧夫準人之官則能居得其人能用終其事此乃使之治國也僞孔以國字屬下句非則罔有立政用儉人注馬融曰儉利佞人也不訓于

德注一無于字是罔顯在厥世注在一作哉繼自今立

政其勿以儉人注儉一作儉一作愆其惟吉士用勸相

我國家注國一作邦疏儉者說文云諛也又有愆字云疾利也訓與順通顯者釋詁云

光也勸者說文云勉力也引周書曰用勸相我邦家言  
商周前人無有立政用諛佞之人者彼不順于德是無  
能光顯于世繼自今立政其勿用諛佞之人其惟善士  
用勉助我國家馬注見釋文云檢利佞人者卽說文愬  
字疾利口之借義也勿以檢人釋文云檢又作愬說文  
又作諛云問也引周書曰勿以諛人問者字義非經詰  
也蓋壁書假借之文訓于德是罔顯在 今文子文孫孺  
厥世熹平石經作訓德是罔顯哉厥世

子王矣其勿誤于庶獄惟有司之牧夫 言今守文之子  
孫乃惟孺子王

矣其勿誤于庶獄惟有司之牧夫 其克詰爾戎兵 注馬融曰詰

實也以陟禹之迹方行天下至于海表罔有不服以覲

文王之耿光 注耿一作鮮以揚武王之 大烈嗚呼繼自

今立政其惟克用常人 注詰者鄭注周禮云謹也陟者

書疏廿四

云溥也齊語云以方行於天下注云方當作橫觀者釋  
詰云見也耿者王逸注楚詞云明也烈者釋詰云業也  
常人臯陶謨曰彰厥有常吉哉言能謹汝戎兵以陞禹  
之迹溥行天下至于海外無有不服以見文王之明光  
以揚武王之大業繼自今立政其惟能用有常之人有  
常猶有恒也此言得人之效周之九服卽禹弼成之五  
服分爲九者故云禹迹馬注見釋文云詰實者實  
當爲責形相近字之誤也廣雅釋詰云詰責也 周公

若曰太史司寇蘇公式敬爾由獄以長我王國茲式有

慎以列用中罰 疏式者釋詰云用也列者服問云等此

平也周公呼太史者以其記言記動嘉蘇公之慎獄平

法欲使書之故先呼之也司寇蘇公者春秋左氏成十

一年傳云昔周克商使諸侯撫封蘇忿生以溫爲司寇  
是忿生爲武王司寇也言司寇蘇公之法用敬汝用獄  
以長我王國之祚此用有慎以其等比用 則于惡且  
平罰也江氏聲說以周禮刑平國用中典 則于惡且

立政第廿四終



光緒歲在闕逢涪灘國子監肄業生吳縣朱記榮校刊

書疏廿四

九

光緒甲申小春  
月白堤八字橋  
孫谿槐廬家塾

立政第廿四終

顧命第廿五上 周書十六 尚書今古文注疏卷廿五

賜進士及第授通奉大夫山東督糧道加三級孫星衍撰

**注** 史遷說成王將崩懼太子釗之不任乃命召公畢公

率諸侯以相太子而立之成王既崩二公率諸侯以太

子釗見於先王廟申告以文王武王之所以為王業之

不易務在節儉毋多欲以篤信臨之作顧命馬融曰成

王將崩顧念康王命召公畢公率諸侯輔相之鄭康成

曰臨終出命故謂之顧命將去之意也迴首日顧

**疏** 史公說見周本紀云二公者召公畢公也云見於先王廟者

書疏廿五上

廟門俟也云毋多欲者即經文所云冒貢非幾也馬注

見釋文鄭注見史記集解及書疏云臨終出命者緇衣

云葉公之顧命曰注云臨死遺書曰

顧命云迴首日顧者詩匪風箋同義

惟四月哉生魄**注**鄭康成曰此成王二十八年居攝六

年為年端魄一作霸**疏**漢書律歷志云三統成王元年

魯之歲也後三十年四月庚戌朔十五日甲子哉生霸

故顧命曰惟四月哉生霸云云是謂成王即位二十年

而崩也案成王在位年數史記無文劉歆說以哉生霸

為十五日亦不可信鄭注見書疏及詩烈文疏云此成

王二十八年者竹書紀年云成王三十七年陟是以武

王崩之明年為成王元年統周公居東二年攝政七年

凡九年故三十七年除此九年則為二十八年與鄭合

也竹書後出或即用鄭義云居攝六年為年端者王氏

鳴盛云詩疏引此注不全當讀其下云至此三十年文

義乃備也知者鄭於康王之詒注云周公居攝六年制

禮樂至此三十年居攝終於七年加二十八年故三十年也鄭具言此者鄭注金縢據大戴禮武王崩成王年十歲二年喪畢年十三管蔡流言周公避居東二年感風雷迎公歸時成王年十五卽居攝元年五年營成周六年制禮七年致政明年成王卽政年二十二卽政二十八年崩年四十五也案賈誼新書修政篇云周成王年二十歲卽位享國親以身見於粥子之

**王不懌**  
**注**馬

家而問焉與此推為年二十二又不同

融作不釋曰疾不解也一作不豫  
**疏**懌俗字詩傳云懌女美箋云說懌當作說釋是懌亦當从采也馬注見釋文云疾不解者說文云釋解也歷律志引顧命曰王有疾不豫是今文作

豫不豫見金縢疏  
**甲子王乃洮頰水**  
**注**馬融曰洮洮髮

也頰頰面也鄭康成讀洮為濯說澣衣成事頰一作洮  
一作頰  
**疏**頰頰歷律志引作洮洮案頰俗字當為頰或洮見說文漢書禮樂志注晉灼曰洮古頰字

書疏廿五上

司馬遷傳集注云頰古洮字實則頰醜皆頰別字也馬注見釋文云洮洮髮者一切經音義七引通俗文淅米謂之洮洮爾雅釋文引釋訓注洮猶淅也玉藻云日五盥沐稷而醕梁洮是淅米或當為沐稷故以洮髮為說也頰頰面者說文云洮洒面也又作頰云古文洮从頁鄭注見吳志虞翻傳注以洮為濯者周禮守洮注古文洮為濯是洮與濯可通用也云澣衣成事者王既病困欲顧命羣臣恐有不絮又不便更衣澣濯其汗方被冕服以成事耳虞翻駁之既非或疑鄭以濯釋洮頰二字尤失之矣段氏玉裁疑說文古文作頰以今本作頰為誤

字相被冕服憑玉几  
**注**鄭康成曰相者正王服位之臣

為大僕冕元冕憑一作凭  
**疏**相謂大保芮伯畢公等也周禮司几筵注鄭司農云

書顧命曰成王將崩命大保芮伯畢公等被冕服馬王几是先鄭以相為大保等也此或今文說與後鄭異憑當作馮俗又加心卽凭假借字說文云凭依几也从任几周書曰凭王几讀若馮鄭注見書疏云相者正王服

位之臣謂大僕者周禮夏官太僕職云掌正王之服位又檀弓云扶君卜人師扶右注云謂君疾時也卜當爲僕聲之誤也僕人射人皆平生時贊正君服位者故以此相爲相導之相爲太僕也云冕元冕者周禮司服職冕服有六元冕爲下皆祭服也覲禮云天子衮冕者以受諸侯朝覲于廟中故服冕服之尊者比尋常視朝當加一等則是元冕矣中論法象篇云顛沛而不亂者成王其人也將崩體被冕服然後發顧命是說此經之義也

乃同大保奭芮伯彤伯畢公衛侯毛公師氏虎臣百

尹御事注鄭康成曰公兼官以六卿爲正次芮伯入爲

宗伯畢公入爲司馬疏同謂同名羣臣受顧命也大保

九十三而崩周公武王之弟也兄弟相差不過十年武王崩周公居攝七年復政退老出入百歲矣召公周公之兄也至康王之時尙爲太保出入百有餘歲矣芮伯者詩桑柔序云芮伯畿內諸侯王卿士當卽此芮伯子

書疏廿五上

三

孫彤伯未有見路史國名紀五云彤伯爵成王子唐韻作彤云成王支庶書疏引王肅云姒姓之國肅蓋據夏本紀禹後有形城氏言之未必是此彤伯也畢公衛侯毛公者鄭注周禮大宰職云都鄙公卿大夫之采邑王子弟所食邑周召毛聃畢原之屬在畿內者則畢毛皆畿內諸侯也春秋左氏僖廿四年傳云管祭郊霍魯衛毛聃鄆雍曹滕畢原鄆郚文之昭也則畢毛衛皆文王子也師氏見周禮地官有師氏中大夫一人其職云掌以媵詒王是也虎臣卽虎賁氏周禮夏官有虎賁氏下大夫二人其職云舍則守王閑王在國則守王宮國有大故則守王門大喪亦如之百尹御事者釋言云尹正也謂衆正之官主事者古今人表第三等有芮伯師伯毛公師氏龍臣師古曰師伯尙書作彤伯龍臣尙書作武臣師伯龍臣當是今文尙書也唐人諱虎爲武然則班氏以師氏龍臣爲人名非官名也鄭注見詩洪渙序疏及桑柔疏云公兼官以六卿爲正次者六卿分職法天地四時自虞夏至周皆同此將傳顧命所召六人自是六卿也召公稱太保畢毛稱公自是三公大傅天子

三公司徒公司馬公司空公鄭注云周禮天子六卿與太宰司徒同職者謂之司徒公與宗伯司馬同職者謂之司馬公與司寇司空同職者謂之司空公一公兼二卿舉下以爲稱鄭注君稟序答趙商問皆謂三公兼師保則得師保之稱今此經六人中有三人爲三公自是以三公兼六卿者故云公兼官而又云以六卿爲正次者三公之次首太師次太傅次太保今乃以太保居首自是依周禮天官冢宰地官司徒春官宗伯夏官司馬秋官司寇冬官司空之次不依三公之次且康叔爲司寇卽此衛侯適居第五司寇之次故云以六卿爲正次也蓋三公官不備有其人則設無則闕惟六卿爲實職故坐而論道之時則首太師次太傅次太保及作而行之之時不妨太保居首太師次太傅反居其後然則召公以冢宰兼太保畢毛二人未知誰爲師誰爲傳即鄭公旣是冢宰以次則芮伯是司徒當若僞傳所說卽鄭亦自言以六卿爲次今乃以芮伯入爲宗伯鄭必別有據也云人者蓋衛是畿外諸侯名芮形畢毛亦俱是畿內諸侯而皆爲王朝公卿故言人淇澳詩序衛武公入相

書疏廿五上

四

于周國語鄭桓公爲周司徒左傳鄭武公莊公爲平王卿士自古有此制也 王曰嗚呼疾大

漸惟幾病日臻旣彌留恐不獲誓言嗣茲予審訓命汝

**疏**漸者列子力命篇云季梁得疾七日大漸殷敬順釋文云漸劇也案劇卽勳字釋詁云幾危也臻至也病者說文云疾加也彌者釋言云終也說文正作彌誓者釋言云謹也審者說文云詳審議也審亦爲詳王自歎疾大劇惟危病至日加旣命當終而淹留之際恐不得謹告于後嗣此予詳訓教令汝

昔君王

武王宣重光 **注**馬融曰重光日月星也大極上元十一

月朔旦冬至日月如疊璧五星如連珠故曰重光 **疏**宣

詩淇澳釋文引韓詩云顯也重光者易離卦彖詞云日月麗乎天又曰重明以麗乎中正乃化成天下言文武化成之德比于日月也又文王武王時有此瑞應也周禮大宗伯疏引元命包云文王之時五星以聚房也御

覽三百廿九引桓譚新論云二年甲子日月若連璧五星若連珠味爽武王至于商郊牧野是其事也馬注見釋文云日月星者是謂日月及金木水火土五星也云大極上元十一月朔旦冬至云云者律歷志云淳于陵渠復覆太初歷晦朔弦望皆最密日月如合璧五星如聯珠注孟康云謂太初上元甲子夜半朔旦冬至時七曜皆會斗牽牛分度夜盡如合璧聯珠也案大極卽大初此所謂歷元也劉昭注續漢律歷志引韓子曰四千五百六十歲爲一元周髀算經云陰陽之數日月之法十九歲爲一章四章爲一部部七十六歲二十部爲一遂遂千五百二十歲三遂爲一首首四千五百六十歲七首爲一極極三萬一千九百二十歲生數皆終萬物復始天以更元作紀

歷馬注殆謂此也 莫麗陳教則肄肄不違用克達殷

集大命注達一作通集一作就疏莫麗者莫定見禹貢說文作駝周語伶州鳩曰昔武王伐殷歲在鶉火月在天駟日在析木之津辰在斗柄星在天竈星與日辰之

書疏廿五上

五

位皆在北維又云王欲合是五位三所而用之又云王以黃鐘之下宮布戎于牧之野故謂之厲所以厲六師是以日月星定七律之數也故云莫麗陳教則肄者言布陳教民習兵卽所謂布戎厲六師也顏氏家訓書證篇引太公六韜有天陳地陳人陳靈鳥之陳是陳爲戰陳也肆者說文云習也正作肄漢書義縱傳注李奇曰閱也霍光傳云光出都肄郎注孟康曰肄習也師古曰謂總閱試習武備也達者鄭注考工記云猶至也言文武既有日月重光之瑞定律歷之數列陳以教民習武伐商習之者不違教令前歌後舞用能至商以就大命也熹平石經作通殷就大命達作通 在後之侗注馬融者說文云達通也集作就者詩傳文

作訓曰共也後一作夏后敬迓天威嗣守文武大訓無

敢昏逾說說文云訓共也周書曰在夏后之訓則此經文脫夏字後當作后也夏者說文云中國之人也后者說文云繼體君也言在中夏皆後君之其職也徐鉉本說文及玉海藝文志考引俱作夏后徐鉉本

及韻會舉要引在后之謂誤也迂當為訝釋詁云迎也昏與混通逾者說文云遞進也引此文是為越也言敬迎天之威命繼守文武大教無敢混弃逾越者馬注見釋文云謂共者祭統云設同凡注云同之言謂是謂即同與說文訓共義通

今天降疾殆弗與弗悟爾尚明時

朕言用敬保元子釗宏濟于艱難

**疏**殆者釋詁云危也與者釋言云起也

悟與寤通詩傳云覺也覺猶知方言云知愈也向者釋言云庶幾尙也明與孟聲相近釋詁云勉也宏大艱難皆釋詁又濟者釋言云成也言今天下危疾弗起弗愈汝庶幾勉我所言以敬安長子釗大成于艱難也

遠能邇安勸小大庶邦思夫人自亂于威儀爾無以釗

冒貢于非幾注馬融貢作贛曰陷也冒一作助疏柔遠能而通而如也勸者廣雅釋詁云教也夫者鄭注曲禮云丈夫亂者釋詁云治也威者廣雅釋詁云則也冒者

書疏廿五上

春秋左氏文十八年傳云冒於貨賄注冒亦貪也貢者廣雅釋言云獻也幾與機通淮南主術訓云治亂之機高誘注云機理言當安遠如邇安教小大衆國思丈夫人人當自治于儀則汝衆國無以釗為貪而進奉以非法之財賄偽傳以冒貢于非幾為冒進于非危之事江氏王氏俱無駁今不從之者史記云申告以文王武王之所以為王業之不易務在節儉毋多欲以篤信臨之此篇惟冒貢非幾為多欲之義釋文冒一音墨是古說亦有以為貪墨之義者知史公即解此文蓋孔安國古文說也馬注見釋文云冒馬鄭作助貢馬注作贛王氏鳴盛云即借助為冒也贛為陷者贛从贛省聲贛讀若坎坎之義為陷凡人為惡或進而冒觸或退而墜陷故兼言助贛也江氏聲云說文陷或

作即出綴衣于庭注鄭康成曰連綴小斂大斂之衣于

庭中疏茲既受命還謂羣臣既受顧命而還退也鄭注見周禮幕人疏云連綴大斂小斂之衣者喪大

記小斂衣十九稱大斂君陳衣于庭百稱故鄭以出綴衣爲陳衣也江氏聲以爲鄭君所云豫凶事王氏鳴盛辨之云王制云六十歲制七十時制八十日制九十日修惟絞紛衾冒死而後制疏云歲制謂棺也不易成故歲制時制一時可辨是衣物難得者月制一月可辨衣物易得者日修棺衣皆畢但日修理之此皆謂大夫以下人君卽位爲禭不待六十成王崩年四十九喪具固宜早辨況疾已危殆斂衣尤不可緩故鄭爲此說也

越翼日乙丑注翼一作翌王崩注馬融本作成王崩曰

安民立政日成疏翼與翌通說文翌明日也律歷志引此作翌亦假音音王崩釋文云馬本

作成王崩白虎通崩薨篇云書曰成王崩天子稱崩何別尊卑異生死也周禮司几筵及天府注鄭司農皆引此作成王崩是今文古文本有成字作僞傷者刪之也成王蓋生有是稱死而因以爲諡也馬云安民立政日成者周書太保命仲桓南宮毛倬爰齊侯呂伋以二于諡法解文

書疏廿五上

戈虎賁百人逆子釗于南門之外疏太保卽上保奭仲桓南宮毛古今人

表第三等有中桓南宮髦當是今文春秋左氏昭廿三年傳有南宮極注云周卿士廿四年傳有南宮鬯注云極之子疑卽毛後則世爲卿士也俾者釋詁云使也爰者釋文云引也呂伋者齊世家云太公卒子丁公呂伋立說文云齊太公子伋諡曰玁公春秋左氏昭十二年傳楚靈王曰昔我先王熊繹與呂級王孫牟暨父禽父並事康王釋文云級本亦作伋虎賁氏周禮夏官有虎賁氏下大夫二人虎士八百人注云不言徒曰虎士則虎士徒之選有勇力者又夏官有旅賁氏中士二人其職云喪紀則執戈盾則此言二千戈蓋桓與毛所執卽旅賁氏之官也虎賁百人蓋呂伋從八百人中選用百人也周禮虎賁氏之職大喪守王門虎賁氏秩僅下大夫而齊侯伋爲之者蓋以列侯兼領此職備非常也逆者說文云迎也關東曰逆關西曰迎南門者廟門史記所云二公率諸侯以太子釗見於先王廟是也僞傳云南門路寢門又云臣子皆侍左右將正太子之尊故出于

路門外更就逆門外所以殊之江氏聲駁之以爲子釗以王未疾時奉使而出王之寢疾不過旬日不及召太子以南門爲外朝之臯門似不如史公廟門之說爲長也玉藻疏引左氏舊說及賈逵盧植蔡邕服虔等皆以祖廟與明堂爲一

### 延入翼室恤宅宗

**注**

翼一作翌宅一作度

**疏**

延者釋詁云進也翼者詩箋云在旁曰翼釋名云夾室在堂兩頭故曰夾也翼室者左路寢也說苑修文篇云諸侯正寢三一日高寢二日左路寢三日右路寢高寢者始封君之寢也二路寢者繼體君之寢也又云然則天子之寢柰何曰亦三承明繼體守文之君之寢也左右之路寢謂之承明何曰承乎明堂之後者也則翼室卽左路寢也恤者釋詁云憂也宅宗者後漢書班固傳典引云正位宗度注云尚書曰延入翼室恤度宗度居也宗尊也江氏聲云宗者白虎通宗族篇云宗尊也爲先祖王也是宗猶主也憂居爲喪主翼一作翌後漢書袁紹傳注引此文宅一作度見後漢書班固傳注此本蔡邕典引注李賢襲之今文宅爲度也

### 書疏廿五上

八

### 作冊度

**疏**

命作冊者以書成王命詞也下文太史秉書由賓階階御王冊命卽此冊也度者說文云

法制也蓋謂喪儀

光緒甲申小春  
月白堤八字橋  
孫谿槐廬家塾

光緒歲在闕逢涪灘國子監肄業生吳縣朱記榮校刊  
顧命第廿五上終

顧命第廿五下 周書十六 尚書今古文注疏卷廿五

賜進士及第授通奉大夫山東督糧道加三級孫星衍撰

越七日癸酉伯相命士須材注鄭康成曰癸酉蓋大斂

之明日也狄設黼辰綴衣注辰一作衣牖間南嚮敷重

篋席注敷一作布篋一作萑黼純華玉仍几注鄭康成

曰華玉五色玉也馬融曰篋織翦鄭康成曰不用生時

席新鬼神之事也篋析竹之次青者疏越七日癸酉者

癸酉蓋大斂之明日者曲禮云生與來日死與往日注

云與猶數也生數來日謂成服杖以死明日數也死數

往日謂殯斂以死日數也此土禮貶于大夫者大夫以

上皆以來日數王制云天子七日而殯計王以乙丑崩

書疏廿五下

一

辛未為七日王申為八日癸酉為大斂之明日然則成

王以王申大斂矣伯相者召公以西伯入相初時與周

公為二伯周公既歿畢公代之下文太保率西方諸侯

畢公率東方諸侯是也須者易歸妹虞注云需也材者

椁材也檀弓云天子崩虞人致百祀之木可以為棺椁

者斬之疏云百祀者王畿內諸臣采地之祀檀弓又云

既殯旬而布材此則殯之明日即采土須材者天子七

日而殯與諸侯以下不同久之欲其乾腊也狄者祭統

云翟者樂吏之賤者也喪大記云狄人設階狄與翟通

黼辰者釋器云斧謂之黼郭注云黼文畫斧形因名云

周禮司几筵職云王位設黼依考工記云白與黑謂之

黼辰者說文云戶牖之間謂之辰謂一戶兩牖之間也

明堂位云天子負斧依南鄉而立注云斧依為斧文屏

風於戶牖之間辰依通字綴衣蓋卽中庸所云設其裳

衣史公何氏休俱以此為在宗廟也傳云幄帳無文以

証之牖者說文云穿壁以木為交窗也大戴盛德篇說

明堂之制一室而有四戶八牖則是每室皆有二牖夾

戶故云設黼辰牖間謂二牖之間正當北戶以屏風也

諸家說戶牖之間以爲一戶一牖之間失之嚮當爲鄉俗加向周禮司几筵注鄭司農引此作鄉敷者說文引作布是義爲布也蔑俗从竹當爲蔑卽篇假音字說文云祭也祭折竹筴也筴竹膚也筴與蔑聲亦相近馬注見釋文云纖籜者籜當爲籜說文籜蒲本可以爲平席纖籜其細者鄭注見禮器疏及書疏云不用生時席新鬼神之事者周禮司几筵職云王位設黼依依前南鄉設莞筵紛純加纁席畫純加次席黼純是王生存時牖間之位設三重席席有異物異純不用篋席今則重席惟用篋席黼純上下不異是不用生時席也舉一反之則下文三席皆非生時席可知此鄭義也云篋折竹之次青者竹之外皮爲青故竹筒有殺青之說青之內爲竹膚卽次青也說文以篋爲竹膚篋篋聲之緩急義則一也黼辰熹平石經作黼依蔑說文作莫引周書曰布重莫席云莫席纖籜席也讀與蔑同黼純者釋器云緣謂之純其色白與黑也華玉鄭注見書疏玉五色王者說文云瓊玉英華相帶如瑟弦瓊玉英華羅列秩秩是所謂華玉也仍者釋詁云因也仍几者周禮司几筵云

書疏廿五下

二

凡吉事變几凶事仍几注鄭司農云變几變更其質謂有飾仍因也因其質謂無飾也引此文西序東嚮注鄭康成曰此且夕聽事之坐敷重底席注馬融曰

底青蒲也鄭康成曰底致也篋纖致席也綴純文貝仍

几疏序者釋宮云東西牆謂之序西序東嚮鄭注見書疏云此且夕聽事之坐鄭王亦以爲然知是鄭注

諸家脫之疏云牖間是見羣臣觀諸侯之坐見于周禮東序西嚮養國老及饗與燕禮同其西序之坐在燕饗坐

西嚮則養國老及饗與燕禮同其西序之坐在燕饗坐前以其且夕聽事重于燕飲故西序爲且夕聽事之坐

底席馬注見釋文云青蒲者玉篇有底引此文云孔安國曰篋平也本作底書疏云禮注謂蒲席爲蕝平考問

傳鄭注云萃今之蒲平也釋名云蒲平以蒲作之其體平也今本釋名萃誤葦說文云蕝蒲子可以爲平席也

御覽引說文下有云世謂蒲平卽馬氏所云青蒲席也說文底同砥馬氏以其名底義爲平故以爲蒲平也鄭

注見書疏云底致者釋詰文致同綴說文云密也云篋  
織致席者與馬以爲蒲席義異蓋以上文篋席析竹次  
青此底席當亦以竹爲之名曰底者加細致也綴純者  
江氏聲云以此上下文與周禮參之則綴純者其績純  
周禮司几筵有莞纒次蒲熊五席又有葦席萑席凡七  
席而純則惟紛畫黼績四者此經上下文有黼純畫純  
紛純與綴純而四則綴純當司几筵之績純矣案大戴  
盛德篇云赤綴戶也盧氏注云綴飾也以爲畫飾則與  
績同江氏說是也文貝者釋魚說貝之種類有十有云  
餘蜺黃白文餘泉白黃文又陸璣疏有紫貝白質如玉  
紫點爲文皆

東序西嚮敷重豐席畫純注鄭康成曰豐

席刮漑竹席畫純以雲氣畫之爲緣彫玉仍几注東序

者文王世子云始之養也適東序釋奠于先老遂設三  
老五更之席位焉特牲云祝命徹胙俎豆邊設于東序  
下注云胙俎主人之俎設于東序下將私燕也是東序  
爲養國老燕羣臣之坐也豐席畫純鄭注見書疏云刮

書疏廿五下

三

漑竹席者漑今本誤作凍說文刷刮也漑瀟也廣雅釋  
詁云瀟洒也蓋以竹爲席加之洒刷也易豐卦六二云  
豐其蔀鄭注云蔀小席馬融曰蔀小也疑蔀當爲筓字  
隸書艸竹通用故鄭知竹席也云畫純以雲氣者鄭注  
三禮凡言畫者輒以雲氣爲說鄉射記凡畫者丹質喪  
大記畫荒注云皆爲畫雲氣彫玉者釋器云玉謂之彫  
又曰彫謂之琢

西夾南嚮敷重筓席注馬融曰筓筓鄭康成

曰筓析竹青皮也禮記曰如竹筓之有筠玄紛純注鄭

康成曰以元組爲之緣漆仍几注西夾者卽九室之右

此蓋在西南筓席馬注見釋文云筓筓者說文云筓竹  
箬也箬楚謂竹皮曰箬是馬以爲竹皮也鄭注見禮器  
疏云筓析竹青皮者筓俗作筠字今禮器亦作筠鄭所  
見本當借筓字爲之筓者說文云竹胎也元紛純鄭注  
見書疏云元組者鄭注司几筵云紛如綬說文云組綬  
屬則綬亦可言組也漆說文作漆云木汁可以髹物象

形黍如水滴而下此借用名漆字也

**越玉五重**

馬融曰越玉越地所

獻玉也

**疏**越王馬注見釋文云越地所獻玉未詳偽傳讀越爲于

**陳寶**

鄭康成

曰陳寶者方有大事以華國也寶一作案赤刀大訓弘

璧琬琰在西序

**注**

鄭康成曰赤刀者武王誅紂時刀赤

爲飾周正色也大訓者謂禮法先王德教虞書典謨是

也宏大也琬琰皆度尺二寸者

**疏**

陳寶鄭注見書疏云大事者謂將有朝諸

侯之事周禮天府職云凡國之玉鎮大寶器藏焉若有大祭大喪則出而陳之寶說文作案引周書曰陳案赤刀赤刀已下鄭注見周禮天府疏及書疏云誅紂時刀者周書克殷解云商辛既自燔于火武王擊之以輕呂斬之以黃鉞史記周本紀云以輕劍擊之則武王誅紂以劍非刀也鄭或別有所本檀弓云周人尙赤是赤爲

書疏廿五下

周正色也云大訓謂禮法先王德教虞書典謨是者說文云典五帝之書也從册在刀上尊閣之也云宏大釋詁文云大璧琬琰皆度尺二寸者考工記玉人職云大琬尺有二寸宗后守之則王所世守之大璧自必亦尺二寸琬圭琰圭玉人職皆九寸彼是至使之瑞節此是宗器或較大也

**大玉夷玉**

**注**大玉

夷玉一作顓頊天球

**注**

馬融曰夷玉東夷之美玉球玉

磬鄭康成曰大玉華山之球也夷玉東北之珣玗琪也

天球雍州所貢之玉色如天者皆璞未見琢治故不以

禮器名之河圖

**注**

鄭康成曰河圖圖出于河帝王聖者

之所受一有雜書二字在東序

**注**

序一作杵

**疏**

大玉鄭注見書

疏云大玉華山之球者禹貢雍州貢球珣玗珎不云出于華山釋地云西南之羨者有華山之金石焉不云出

玉鄭說未詳也夷玉天球馬注見釋文云夷玉東夷之  
美玉者說與鄭同云球玉磬者說文球玉聲也或作璆  
聲字疑當爲磬阜陶謨云鳴球也鄭注見書疏云華山  
之珣玕琪者釋地云東方之美者有醫無閭之珣玕琪  
焉鄭言東北者周禮職方氏云東北曰幽州其山曰醫  
無閭是可以云東北也說文云珣醫無閭之珣玕琪周  
書所謂夷玉也是許鄭馬同義云天球雍州所貢之玉  
色如天者蓋卽蒼璧亦未詳云皆璞未見琢治者老子  
云樸散則爲器王注云樸者真也案樸字俗从玉爾雅  
釋文云璞字又作樸云故不以禮器名之者上文言璧  
言琬琰此無器名故知未琢治也云河圖圖出于河帝  
王聖者之所受者漢書五行志云劉歆以爲伏羲氏繼  
天而王受河圖則而畫之八卦是也鄭不以河圖爲入  
卦云帝王聖者之所受者禮運疏引中候握河紀云堯  
時受河圖龍銜赤文綠色廣博物志十四引尸子曰禹  
理鴻水觀于河見白面長人魚身出日吾河精也授禹  
河圖而還于淵中是不獨伏羲受之也江氏聲說以墨  
子非攻篇云天命文王伐殷有國泰顛來賓河出錄圖

書疏廿五下

五

宋書符瑞志云周公旦攝政七年與成王觀于河沈璧  
禮畢榮光出河青龍臨壇元甲之圖坐之而去周公援  
筆寫之則周家世授河圖宜爲祕寶也班固典引云御  
東序之祕寶以流其占蔡邕注曰東序牆也尙書曰顛  
項河圖雜書在東序流演也河圖雜書皆存亡之事尙  
覽之以演禍福之驗也案蔡氏所引蓋今文尙書也序  
作杼者文選王儉褚淵碑文餐東杼之祕寶李奇注云  
雜書天准聽曰天球河圖在東杼天球寶器也河圖本  
紀圖帝王終始存亡之期典引曰御東序之祕寶然野  
當爲杼古序字也案尙書大傳天子賁庸諸侯疏杼注  
云杼亦牆也是今文尙書序作杼假借字也是大玉  
夷玉一作顛項河圖一作河圖雜書蔡邕今文也

之舞衣大貝鼗鼓在西房兌之戈和之弓垂之竹矢在

東房注鄭康成曰允也兌也和也垂也皆古人造此物

者之名大貝者書傳曰散宜生之江淮之浦取大貝如

車渠是也。鼗鼓大鼓也。此鼗非考工記鼗鼓長八尺者。若是周物，何須獨寶？守明前代之物，與周鼗鼓同名耳。  
**說**允者，疑卽允征之允。鄭注書序云：允，臣名，垂疑卽舜其工。大貝者，殷傳云：西伯旣伐者，紂囚之，牖里散宜生迷之，犬戎氏取美馬，駮身朱鬣，雞目者，西海之濱，取白狐青翰之於陸氏，取怪獸，大不辟，虎狼尾，倍其身，名曰虞之有參氏，取美女之江淮之浦，取大貝，大如車渠，陳干紂之庭，紂出見之，還而觀之，遂遣西伯伐崇，是其事也。貝，大如車渠者，考工記注鄭司農云：渠謂車輪，則車渠謂車輪也。大貝旣入于紂，又爲周祀寶者，武王克殷，仍得之，是文王所以免難，使子孫守之，無忘憂患也。房者，說文云：室在傍也。夾室，蓋左右，不則房卽東西室之在明堂大室兩傍者。玉藻疏云：太廟路寢旣如明堂，則路寢之制，上有五室，不得有房。而顧命有東房西房，鄭荅趙商云：成王崩時，在西都，文王還豐，鎬作靈臺，辟雍而已，其餘猶諸侯制度焉。故知此喪禮設衣物有

書疏廿五下

六

夾有房也。周公攝政，制禮作樂，乃立明堂於王城。案鄭氏此說亦未然。古者明堂靈臺辟雍同處，靈臺則明堂臺門，辟雍則明堂宮垣外四周之水。文王旣作靈臺，辟雍卽有明堂矣。鄭注見周禮天府疏云：鼗鼓長八尺者，釋樂云：大鼓謂之鼗。考工記云：鞀人爲鞀，陶鼓長八尺，鼓四尺，中圍加三之一，謂之鼗。鼓周禮大司馬云：諸侯執賁，鼓則大輅在賓階。面注鄭康成曰：大輅，玉輅，輅一或作賁也。

作路贅輅在阼階。面注鄭康成曰：贅，次次在玉路後，謂

玉路之貳也。先輅在左塾之前。注鄭康成曰：先路象路

門側之堂，謂之塾，謂在路門內之西北面，與玉路相對

也。次輅在右塾之前。注馬融曰：不陳戎路者，兵車非常

故不陳之。鄭康成曰：象路之貳與玉路之貳相對，在門

內之東北面不陳金輅革輅木輅者主於朝祀而已

**疏**

塾者禮運疏引白虎通云所以必有塾何欲以飾門因取其名也明臣下當見於君必先熟思其事也大路等鄭注見周禮典路疏云大路玉路者大戴禮朝事篇云乘大路建大常十有二旒樊纓十有再就周禮巾車職云王之五路一曰玉路錫樊纓十有再就建大常十有二游合証二文大路卽玉路也鄭又以贅爲次謂是玉路之貳者巾車子玉路貳車無文大戴禮朝事篇云天子乘大路貳車十有二乘是大路有貳也云先路象路者周禮巾車職王之五路無先路之名其名惟見于此及郊特牲鄭于郊特牲無解而以此爲象路者巾車職云象路以朝此經將有受朝之事當陳象路茲凡四路大路旣是玉路贅次又皆是副貳之名故推先路以爲象路但巾車職言象路朱樊纓七就而郊特牲言先路三就不同者蓋郊特牲言大路繁纓一就亦與巾車職玉路十有再就不同彼文所言殷制尙質故也云門側之堂謂之塾者釋宮文考工記匠人有門堂注云門堂

書疏廿五下

七

門側之堂引釋宮文以證卽此塾矣塾俗字當爲軌隸字譌羊爲土或以埤字當之恐未是鄭又言則爲副貳之路之貳者次者說文云不前也對先而言則爲副貳之名云不陳金輅革輅木輅者主于朝祀者見書疏金字今本誤作象巾車職王之五路玉路以祀金路以賓象路以朝革路以卽戎木路以田茲大路是玉路贅路爲其貳先路是象路次路爲其貳則此四路止五路之二未有金輅革輅木輅蓋此時將祭奠于廟而傳顧命故陳玉路又將受諸侯朝故陳象路是以鄭云主于朝祀而已周禮大宗伯職朝于五禮屬賓禮時諸侯受朝則金路以賓亦宜陳之蓋此時喪中受朝不迎賓無所用金路也書疏引鄭注云綴次是從後之言二者皆爲副貳之車先輅是金輅也綴輅是玉輅之貳次輅是金輅之貳二金輅疑是象輅之誤輅作路者見周禮巾車明堂位禮器郊

二人雀弁執惠注

鄭康成曰赤黑曰雀言

如爵頭色也雀弁制如冕黑色但無藻耳惠狀蓋斜刃

宜芟刈立于畢門之內四人綦弁注馬融曰騏青黑色

鄭康成曰青黑曰騏詩曰我馬維騏綦一作騏執戈上

**刃注**鄭康成曰戈卽今之鉤戈戟夾兩階疏雀弁者白虎通

紳冕篇云士冠經曰周弁殷咺夏收爵何以知指謂其色周之冠色所以爵何爲周尙赤所以不純赤但如爵頭何以本制冠者法天天色元者不失其質鄭注見書疏云赤黑曰雀言如爵頭色者鄭注士冠禮云雀弁者冕之次其色赤而微黑如雀頭然是也云制如冕黑色但無藻者周禮弁師王之五冕皆元冕朱裏延紐五采藻十有二就皆五采士有二玉笄朱紱注云延冕之覆在上是以名焉組小鼻在武上笄所貫也又云諸公之藻旒九就又云諸侯及孤卿大夫之冕各以其等爲之注云侯伯藻七就子男藻五就孤藻四就三命之卿藻三就再命之大夫藻再就是冕皆有藻也雀弁之制延紐笄紱皆與冕同惟無藻爲異耳然則冕而無藻卽與

書疏廿五下

八

雀弁無異而鄭注弁師又云一命之大夫冕而無旒士變冕爲雀弁則似無藻之冕仍與雀弁不同者賈氏士冠禮疏云冕者俛也低前一寸二分故得冕稱雀弁則無前後高之制故不得冕名說文云未詳畢門者鄭司農注周禮閭人及朝士皆云路門一曰畢門是也綦當作辨說文帛蒼艾色新修增綦字卽辨別體也綦弁馬注見釋文鄭注見詩出其東門疏及書疏云青黑曰騏且引詩者說文云騏馬青驪文如博綦也驪是黑色故鄭云謂騏弁色如馬騏文也所引詩皇皇者華文詩鳴鳩云其弁伊騏傳云騏騏文與鄭義同而詩箋乃云騏當作綦以玉爲之于此又不破騏爲綦者鄭注周禮弁師云韋弁皮弁侯伯綦飾七子男綦飾五孤則綦飾四三命之卿綦飾三再命之大夫綦飾二又云士變冕爲爵弁其韋弁皮弁之會無結飾然則鄭氏之意以大夫以上之弁皆有綦飾士弁則無有彼詩所稱淑人君子是謂諸侯此四人是士其弁不得爲綦飾故以騏爲青黑色也知此四人是士者蓋士無位于堂下又弁皆冕而立于堂廉

之上自是大夫此四人立于堂下又弁而不冕與上文  
二人爵弁立于畢門內者皆士也云戈卽今之句子戟  
者漢時名戈爲句子戟鄭舉當時之名以況便干曉人  
也鄭注周禮序官司戈盾亦云戈今時句子戟祀者廣  
雅釋室云祀砌也說文云祀古文一冕執劉立于東  
祀从戶蓋堂砌如人之兩頤也

堂一人冕執鉞立于西堂注鄭康成曰劉蓋今饒斧鉞

大斧序內半以前日堂疏劉字說文所無而劉劉以爲  
聲或縵重文脫之鄭注見書

疏云劉今饒斧者說文云饒銳也斧之尖銳者其形未  
詳云鉞大斧者說文或字解也詩公劉疏引太公六韜  
云大阿斧重八斤一名大戍則戍大于斧也云序內半  
以前日堂者釋宮云堂東西牆謂之序然則序內皆爲  
堂云半已前者對一人冕執戣立于東垂一人冕執瞿  
半以後爲房室也

立于西垂注鄭康成曰戣瞿蓋今三鋒矛疏戣者說文  
云周制倅

書疏廿五下

九

臣執戣兵也垂者釋詁云疆界邊衛圍垂也則垂是邊  
蓋堂下之邊也鄭注見書疏云戣瞿蓋今三鋒矛者詩  
小戎云九矛鑿錚傳云九三隅矛也鋒卽隅謂三稜也

一人冕執銳立于側階注鄭康成曰銳矛屬凡此七兵或施矜或著柄周禮戈長

六尺其餘未聞長短之數側階東下階也銳一作銳疏

銳諺字也當從說文作銳云侍臣所執兵也周書曰一  
人冕執銳讀若允鄭注見書疏云銳矛屬者案說文編  
字以類相从金部鉞下銳銳下鉞鉞下銳銳下鉞云鉞  
小矛也鉞短矛也鉞矛也鉞長矛也則銳列其間亦必  
矛屬矣云凡此七兵者最括惠戈劉鉞戣瞿銳也云或  
施矜或施柄者說文云矜矛柄鄭注考工記盧人云凡  
矜八觚然則掎圓者柄其手握處圓而握不及處爲八  
觚者矜也云側階東下階者鄭注雜記云側階亦有階  
也案考工記匠人職說明堂九階注云南面三三面各  
二此云側階蓋在中階之側鄭云東下階者卽中階之

東也 王麻冕黼裳注鄭康成曰麻冕三十升布也黼裳者

冕服有文者也疏此稱王者白虎通爵篇云天子大斂

後如王也以尚書言迎子釗不言迎王麻冕者自虎通

尚書曰王麻冕冕所以用麻爲之者女功之始亦不忘本也

也垂旒者示不見邪曠塞耳示不聽讒也故禮玉藻曰

十有二旒前後邃延禮器曰天子麻冕朱綠藻垂十有

二旒者法四時十二月也諸侯九旒大夫七旒士爵弁

無旒鄭注見書疏云麻冕三十升布者孔安國注論語

子罕云麻冕緇布冠也古者積麻三十升布以爲之故

云麻冕三十升麻之布以爲冕也布言升者所以辨精

麤也鄭注喪服傳云布八十縷爲升則三十升凡二千

四百縷布之至細者矣凡冠衣之布冠之升數輒倍于

衣朝服十五升故冕三十升也云黼裳者冕服有文者

周之冕服九章黼當其第八其等衰則自九章以至一

書疏廿五下

十

章凡五等天子備有焉據鄭注周禮司服云毳畫虎雉  
宗爨也其衣三章裳二章凡五也則此黼裳者是毳冕  
之裳刺黼黻二章者是有文者也此言由賓階階疏賓  
有文對下蟻裳形裳皆以色言無文也  
者西階坊記云子云升自客階弔於賓位教民追孝也  
注云謂反哭時也既葬矣猶不由阼階不忍即父位也  
文王世子云成王幼不能踐阼周公相踐阼而治注云  
代成王履阼階王位治天下是嗣王乃當踐阼階今升  
自西階者不忍即父位也階俗字當爲躋釋詁  
云陞也詩朝濟于西傳云躋升是躋即躋字 卿士邦

君麻冕蟻裳入卽位注鄭康成曰蟻謂色元也卽位者

卿西面諸侯北面疏蟻說文所無當爲蟻檀弓蟻卽于

蟬大螳小者螳卿士邦君入畢門以聽傳顧命也鄭注

見書疏云蟻謂色元者夏小正云十有二月元駒賁元  
駒也者蟻也賁者何也走於地中也方言云蚍蟬西南  
梁益之間謂之元駒案元者色也云卿西面者謂在中

廷之東諸侯北面者在中廷之南經言  
人卽位不言升階知皆陪位于中廷也  
**太保太史太宗**

**皆麻冕彤裳**  
形者廣雅釋器云赤也詩形弓傳云彤

鄭司農云纁絳也  
**太保承介圭上宗奉同瑁由阼階**

今文同一作銅說爲天子副璽大傳說古者圭必有

**冒不敢專達也天子執冒以朝諸侯見則覆之故冒圭**

**者天子所與諸侯爲瑞也馬融曰同者大同天下鄭康**

**成曰上宗猶大宗變其文者宗伯之長大宗伯一人與**

**小宗伯二人凡三人使其上二人也一人奉同一人奉**

**瑁同酒杯**  
承者詩箋云猶奉也介圭者鎮圭考工記  
玉人職云鎮圭尺有二寸天子守之釋器

書疏廿五下

士

云圭大尺二寸謂之珩詩崇高云錫爾介圭郭氏注爾  
雅引作玠同者白虎通爵篇作銅吳志注虞翻別傳云  
今經益金就作銅字詁訓言天子副璽云今經者古文  
也翻又云雖皆不得猶愈於元是謂今文之說勝于鄭  
氏也今文以銅爲副璽者說文璽王者印也所以士士  
从上籀文从玉大傳云湯放桀而歸於毫三千諸侯大  
會湯取天子之璽置之於天子之坐是殷周已來天子  
有璽也大傳說古者圭必有冒云云者白虎通文質篇  
云合符信者謂天子執瑁以朝諸侯諸侯執珪以親天  
子瑁之爲言冒也上有所覆下有所冒也尙書大傳曰  
天子執瑁以朝諸侯又曰諸侯執所受瑁與璧朝于天  
子無過者復得其珪以歸其那有過者留其珪考工記  
玉人職云天子執瑁四寸以朝諸侯說文云瑁諸侯執  
圭朝天子天子執玉以冒之似犂冠是說此經之義也  
馬注見吳志注虞翻別傳云大同天下蓋以同瑁爲一  
物瑁者義取覆冒天下故爲大同也鄭注見書疏及吳  
志注虞翻傳云上宗猶大宗變其文者宗伯之長大宗  
伯一人與小宗伯二人凡三人使其上二人者周禮序

官云乃立春官宗伯使帥其屬而掌邦禮又云禮官之屬大宗伯卿一人小宗伯中大夫二人是宗伯爲春官之長也此則使小宗伯之上二人與大宗伯同事是使其三人之上二人也小宗伯二人爵位同而得差其上二者蓋同等之中自有長次也必知上宗是二人者奉是兩手共奉之以兩手奉一物則同瑁二物必二人奉之矣且下文王三晚上宗曰饗太保授宗人同明是贊王者大宗伯贊太保者小宗伯也云同酒杯者虞翻別傳云鄭元解尚書違失事四以顧命康王執瑁古曰字似同從誤作同既不覺定復訓爲杯玉人職天子執瑁以朝諸侯謂之酒杯誤莫大焉虞意欲以同爲目解經云受目瑁謂曰圭者瑁以爲一物妄詆鄭氏實非也下文王受同三宿三祭三啜太保受同是同爲酒器俱不可謂之目始知鄭說不可易也江氏聲說同爲圭瓚云以挹鬯裸祭者周禮謂之裸圭王氏鳴盛亦云下文太保以異同秉璋以酢則彼同是璋瓚矣案同今文作銅銅卽金也白虎通考黜篇云圭瓚秬鬯宗廟之盛禮玉以象德金以配情芬香條鬯以通神靈玉飾其本君子

書疏廿五下

三

之性金飾其中君子之道君子有黃中通理之道美素德金者精和之至也王者德美之至也鬯者芬芳之至也君子有玉瓚秬鬯者以配通德也其至矣是銅卽因玉瓚之飾金爲名也江王說是

太史秉書

由賓階躋御王冊命注鄭康成曰御猶嚮也王此時正

立賓階上少東太史東面于殯西南而讀策書以命王

嗣位之事

疏

秉者釋詁云執也書謂所書顧命之策也鄭注見書疏云御猶嚮者御與訝通訝之

言迎迎則向也云王此時正立賓階上少東者以太史隨而升階將由其西讀策王少東避之會子問云君薨而世子生三日少師奉子以衰視先子從子升自西階殯前北面祝立于殯東南隅祝聲三曰某之子某從執事敢見此云太史東面于殯西南隅者少儀云詔詞自右會子問所云是北面而告于殯當在世子之右故立于殯東南隅此則以成王命詔嗣王當立于殯之右故東面于殯西南隅也

曰皇后馮玉几

**注**馮一作凭道場末命汝嗣訓臨君周邦率循大十

變和天下用蒼揚文武之光訓疏皇者釋詁云君也后

謂康王也未者方言云緒也馮者一切經音義十七引

三蒼云依也說文作凭云依几也周書凭玉几讀若馮

下卽弁省文鄭注土冠禮云亦名出於榮榮大也言所

以自光大也案榮與般通廣雅釋詁云般任也變者釋

詁云和也此太史傳述成王之命命康王馮玉几以聽

道揚緒餘之命卽白虎通爵篇云卽繼體之位也言命

汝嗣守此訓以臨君周國率循大任以和天下以對

場文武光顯之訓偽傳以王后爲大君成王誤矣王

再拜興答曰眇眇予末小子其能而亂四方以敬忌天

威疏與者釋言云起也眇眇曹大家注幽通賦云微也

亂者釋詁云治也四方者傳云中國也言我微末

小子其何能而治中乃受同瑁王三宿三祭三咤注馬

國以敬畏天命乎

融咤作託鄭康成曰王旣對神則一手受同一手受瑁

宿肅也却行曰咤王徐行前三祭又三却復本位疏白

通爵篇云王者旣殞而卽繼體之位何緣臣民之心不

可一日無君故先君不可得見則後君繼體矣尙書曰

書疏廿五下

主

王再拜興對乃受銅瑁也明爲繼體君也宿與肅通鄭

注少牢饋食禮前宿一日宿戒尸云宿讀爲肅釋詁云

肅進也馬氏作託見釋文咤俗字說文作託云奠爵酒

也周書曰王三宿三祭三託是奠酒也玉篇云咤本或

作託則卽託字鄭注見書疏云徐行前日

肅者亦以宿爲肅進也却行曰咤未詳

上宗曰饗疏

饗者江氏聲云勸彊王濟酒也土虞禮云哀薦裕事適

爾皇祖某甫饗牲云勸彊之也鄭又注特性饋食禮云

饗勸彊

太保受同降盥以異同秉璋以酢疏盥說文云

之也

者璋瓚祭統云君執圭瓚裸尸大宗伯執璋瓚亞裸郊

特牲云灌以圭璋知灌地之璋瓚得單名璋也鄭箋詩

者璋瓚祭統云君執圭瓚裸尸大宗伯執璋瓚亞裸郊

特牲云灌以圭璋知灌地之璋瓚得單名璋也鄭箋詩

者璋瓚祭統云君執圭瓚裸尸大宗伯執璋瓚亞裸郊

棧樸云祭祀之禮王禪以圭瓚諸臣助之禪以璋瓚以圭璋爲柄杓鬱鬯曰禪璋瓚亞禪既是此太保秉璋則上文王所用以祭之同或卽圭瓚三瓚皆同名殆猶弁冕皆名冠與以酢者謂既獻則自酢也周禮司尊鬯職春祠夏禴秋嘗冬烝以及追享朝享于六彝六尊各用其二而其下輒云皆有鬯諸臣之所酢也注云昨讀爲酢字之誤也諸臣獻者酌鬯以自酢異同者臣不敢襲君器王以上宗勸而齊酒既齊則以同授太保太保受之以降置于篚盥手而取異同升酌執其柄授宗人同以獻則自酢也酢說文本字作醋此假借字

**拜王荅拜太保受同祭噉宅授宗人同拜王荅拜**

**疏**宗人

伯也江氏聲云上文上宗奉同瑁鄭注以爲春官之長大宗伯一人小宗伯二人凡三人使其上二人一人奉同一人奉瑁然則此時堂上有小宗伯一人與大宗伯同在焉自當大宗伯贊王小宗伯贊太保且上言上宗此變文言宗人則自是小宗伯矣爲將拜故授宗人同也王荅拜者燕義云君舉旅于賓及君所賜爵皆降再

書疏廿五下

十四

拜稽首升成拜明臣禮也君荅拜之禮無不荅明君上之禮也是其義太保受同受于宗人也噉者說文云嘗也引此文鄭注雜記云噉嘗也噉至口啐至齒宅疑卽說文奠爵酒也鄭氏以爲却行日咤則是太保受同祭嘗酒而却退也太保授宗人同以傳

**太保降收**

**疏**太保

顧命畢王受顧命亦畢又荅拜之也降江氏聲云降而出應門不言出者于下言入諸侯出見之省文也收者蓋太保收策書宗人收同與

**廟門侯**

**疏**

謂諸侯卽上文所云卿士邦君入卽位者邦君侯是外土諸侯餘皆食采畿內皆畿內諸侯矣王制云天子之縣內諸侯祿也是食采畿內者亦諸侯也廟門

者周本紀云二公率諸侯以太子釗見於先王之廟上文逆子釗于南門之外則此廟門卽南門也侯者侯王出視朝也下云王出在應門之內何可分篇馬鄭本自王若日已下乃爲康王之誥蓋本孔氏古文

**王出**

**在應門之內**

**疏**

應門者釋宮云王門謂之應門禮記疏引李巡云宮中南嚮大門應門也詩傳

云王之正朝曰應門明堂位云雉門天子應門言魯之雉門比于應門也

大保率西方諸侯入應門左畢公率東方諸侯入應門右

**疏**名公為西伯畢公為東伯已歿矣

是時周公皆布乘黃朱

**注**布乘一作黼黻

**疏**布者廣雅釋詁云列

也乘四馬也詩叔于田云乘乘黃傳云四馬皆黃案古

者車一乘駕四馬故四馬為乘黃朱者詩于旄疏引鄭

駁異義云尚書顧命諸侯入應門皆布乘黃朱言獻四

黃馬朱鬣也然則鄭注此文亦云然布乘一作黼黻者

白虎通緹冕篇云天子朱緹諸侯赤緹詩云朱緹斯皇

室家君王謂天子也又云赤緹金鳥會同有繹又曰赤

緹在股皆謂諸侯也書曰黼黻衣黃朱緹亦謂諸侯也

別於天子謂之黃朱黃朱亦赤矣是今文布乘作黼黻

解之者以為衣也布與黼聲相近乘與芾形相近解黃

朱以緹者詩傳云朱芾黃朱芾也于斯干又曰芾者天

子純朱諸侯黃朱漢書韋孟諷諫詩云黼衣朱黻正用今文說也

賓稱奉圭兼幣

書疏廿五下

圭

康成曰此幣以馬蓋舉王者之後以言耳諸侯當璧以

帛亦有庭實

**疏**賓者周禮大宗伯職云以賓禮親邦國

謂朝覲宗遇會同天子以賓禮賓諸侯

也大行人職云掌大賓之禮注云大賓要服以內諸侯

武氏億云賓古文通作擯賓稱是擯者之辭圭者考工

記玉人云命圭九寸謂之桓圭公守之命圭七寸謂之

信圭侯守之命圭七寸謂之躬圭伯守之注云命圭者

王所命之圭也朝覲執焉居則守之故書或云命圭五寸謂之躬圭也幣者周禮小行人職云合六幣圭以馬璋以皮璧以帛琮以錦琥以繡璜以黼注云六幣所以享也五等諸侯享天子用璧享后用琮其大各如其瑞皆有庭實以馬若皮皮虎豹皮也是說圭幣之事鄭注見書疏云此幣王者之後以言者二王之後謂杞宋位尊故享用圭璋而特之此經言布乘黃朱又稱奉圭兼幣故鄭云此幣圭以馬蓋舉王者之後以言爾云諸侯當璧亦有庭實者覲禮云四享皆束帛加璧庭實惟國所有秋官大行人說朝事云廟中將幣之享彼注既用

觀禮篇文又引大戴朝事篇云奉國地所出重物明臣職也則庭實又在圭馬等物之外故詩韓奕疏備引諸文而申之云三享者初享以馬若皮其餘以國地所有之物分之爲二以備三享今此經文不具故鄭補言之偽傳以圭馬卽庭實非也

**曰**一二臣衛敢執壤莫皆再拜稽首王義

**注**

鄭康成曰此朝兼享禮也與常禮不同釋

辭者一人其餘奠幣拜者稽首而已

**疏**

臣衛謂蕃衛壤

物禮器云天不生地不養君子不以爲禮觀禮云庭實惟國所有則此諸侯所執以奠者自是猶獻也堯典云舜讓于德弗嗣白虎通性情篇云義者宜也義嗣言宜嗣德也春秋文八年秋八月庚戌天王崩九年春毛伯來求金公羊傳曰何以不稱使當喪未君也踰年矣何以謂之未君卽位矣而未稱王也未稱王何以知其卽位以諸侯之踰年卽位亦知天子之踰年卽位也是時

書疏廿五下

六

成王崩未踰年康王實未嗣位若真言王荅拜無以異于正卽位者言其宜嗣則未嗣位之意自明鄭注見書疏云釋辭者一人者此時諸侯雖眾但其長一人釋辭不必人人皆釋下文者此皆再拜稽首拜言皆則釋辭不皆可知也云此朝兼享禮者觀禮侯氏旣朝而出乃後云四享皆束帛加璧又鄭注曲禮云諸侯春見曰朝受贄于朝受享于廟是常禮皆朝而後享不同時並行二事今則入門而朝奉圭兼幣庭實俱設是于常禮不同也

大保暨芮伯咸進相揖皆再拜稽首曰敢敬告天子

皇天改大邦殷之命惟周文武誕受羙若

**注**

馬融曰羙

道也克恤西土

**疏**

羙者說文云進善也羙或作誘或作誦古文作羙若者釋言云順也言天

改殷之命惟文武大受而善順之能撫恤惟新陟王畢西土也馬注見釋文云羙道者詩傳文

協賞罰戡定厥功用敷遺後人休

**疏**

陟者釋詁云假陟登陞也曲禮云告

喪曰天王登假是赴告之詞稱天子崩爲登假也釋詁云協服也戡克也敷者說文云敷也引此文言惟新登假之成王盡服其賞罰克定其功用施于後人以休也

今王敬之哉張皇六師無

壞我高祖寡命

**疏**皇者詩傳云大也六師六軍也詩常有二千五百人爲軍王六軍高祖謂文王寡命如康誥

乃寡兄勛謂寡有之命言今王敬之哉張大其六軍無毀敗我文王寡有之命魯語展禽曰周人祖文王而宗武王故稱文王爲高祖書疏云馬鄭本此篇自高祖寡命以上內于顧命王若曰以下始爲康王之誥釋文云庶邦侯甸男衛馬本從此以下爲康王之誥又云與顧命差異序歐陽大

王若曰庶邦侯甸男衛

**注**史遷說

太子釗遂立是爲康王康王卽位徧告諸侯宣告以文

武之業以申之作康誥歐陽大小夏侯同爲顧命鄭康

書疏廿五下

七

成曰獨舉侯甸男衛四服者周公居攝六年制禮班度量至此積三十年再巡守餘六年侯甸男要服正朝要

服國遠旣事遣之衛服前冬來以王有疾留之

**疏**史公

周本紀云作康誥與上文云作顧命非一篇同書序是古文本與顧命異篇也歐陽大小夏侯同爲顧命者見書釋文以此合于顧命乃符二十九篇之數馬鄭雖分之今用藝文志之日爲注疏并取今古文故不分也依熹平石經般庚三篇爲一之式空格以別之鄭注見詩周頌譜疏云周公居攝六年制禮頒度量者明堂位云周公踐天子之位以治天下六年朝諸侯於明堂制禮作樂頒度量而天下大服是鄭氏所本也云至此積三十年再巡守餘六年者鄭于顧命篇首注云此成王二十八年則自制禮以來至此積三十年矣周禮大行人職云十有二歲王巡守殷國然則二十四年王再巡守三十年則再巡守而餘六年矣云侯甸男要服正朝者

據大行人職侯服歲一見甸服二歲一見男服三歲一見采服四歲一見衛服五歲一見要服六歲一見然則侯服年年朝甸服二歲見者至此六年當三朝要服三歲見者六年則再朝要服六歲見者適當其正朝之期也此時朝者當是侯甸男要四服之諸侯經乃言侯甸男衛不見要服鄭氏推求其故以爲要服國遠既事遣之衛服前冬來以王有疾留之江氏聲謂當周之四月正歲爲春仲要服國遠蓋未至也衛服諸侯應以往年來朝容有往年國中多故不得以

**惟予一人釗報告**

**疏**

時至而于是來與說詳合注音疏曲禮疏云顧命成王殯未踰年稱予一人者熊氏云天下不可一日無王故也今謂予一人者以麻冕黼裳卽位受顧命從古故暫稱一人也報者鄭注周禮云復之言報也既稱予一人又稱名亦以未除喪故昔君文武丕平富不務咎底至齊

**注馬融讀絕句**

**疏**釋詁云丕大也

**書疏廿五下**

**六**

冒咎者干冒灾咎也底者釋詁云止也齊者釋言云中也言文武之道大成備故不干災咎止于至中也**信用昭明于天下則亦有熊羆之士不二心之臣保乂王**

**家用端命于上帝**

**疏**保安乂治俱見上疏端者說文云直也直卽正也言周家以信顯明

于天下有如熊羆之勇士純一其心之臣安治王室用正命于天也**皇天用訓厥道付畀四方乃命建侯樹屏在我後之人**

**疏**訓與順通畀者釋詁云予也屏者釋

言云蔽也在者王氏念孫云謂相顧在春秋左氏襄廿六年傳云衛獻公使讓大叔文子曰吾子獨不在寡人吳語云昔吳伯父不失春秋必率諸侯以顧在余一人卽此在字之義也下文云今予一二伯父尚須暨顧亦謂相顧在也言天用順其道付與今予一二伯父尚暨顧爾先公之臣服于先王雖爾身在外乃心罔不

在王室注乃一作廼岡一作無用奉恤厥若無遺鞠子

**羞**疏稱伯父者觀禮云天子呼諸侯之禮同姓大國曰伯父異姓曰伯舅同姓小邦曰叔父異姓曰叔舅

尚者釋言云庶幾尚也胥者釋詁云相也綏字說文本作綏周官夏采以乘車建綏注云綏當為綏釋詁云綏

繼也綏爾先公之臣服于先王當為一句言繼爾先公之臣服于先王也傳讀綏爾先公之臣絕句失之恤

者說文云收也若者釋言云善也鞠者釋言云穉也言今子一二同姓庶幾相與顧在我繼爾前人之臣服于

先王傳爾身在外爾心無不在王家以奉收其善無遺我穉子羞愧也漢書谷永傳永灾異對引此經乃作迺

岡作無羣公既皆聽命相揖趨出王釋冕反喪服注鄭康

成日羣公主謂諸侯與王之三公諸臣亦在焉王釋冕

反喪服朝臣諸侯亦反喪服禮喪服臣為君諸侯為天

書疏廿五下

五

子皆斬衰反喪服一作喪服疏白虎通爵篇云緣始終

也故尚書曰王釋冕喪服吉冕受銅稱王以接諸侯明

已繼體為君也釋冕藏銅反喪明未稱王以統事也何

休注公羊桓元年傳云先謁宗廟明繼祖也還之朝正

君臣之位也事畢而反凶服焉鄭注見書疏云羣公主

謂諸侯與王之三公者三公稱公諸侯亦得通稱公是

時王朝之臣皆在故又云諸臣亦在焉也云朝臣諸侯

亦反喪服者經止言王反喪服故鄭補言之又引喪服

證之者喪服篇云斬衰裳直經杖絞帶冠繩纓菅屨者其目首列父其次諸侯為天子其次君是也

光緒歲在闕逢涪灘國子監肄業生吳縣朱記榮校刊  
顧命第廿五下終

費誓第廿六 周書十七 尚書今古文注疏卷廿六

賜進士及第授通奉大夫山東督糧道加三級孫星衍撰

**注** 史遷說伯禽即位之後有管蔡等反也淮夷徐戎亦

並與反於是伯禽率師伐之於盼作盼誓遂平徐戎定

魯費一作盼一作鮮一作獮一作萊史公說見魯世家云伯禽即位

之後有管蔡等反也淮夷徐戎亦並與反者是以淮夷徐戎反為在與管蔡同時魯世家前文亦云於是卒相成王而使其子伯禽代就封於魯管蔡武庚等果率淮夷而反周公乃奉成王命與師成伐作大誥周本紀云召公為保周公為師東伐淮夷殘奄又云既紕般命襲淮夷在豐作周官是伯禽先伐淮夷在管蔡以般畔之時周公伐淮夷在歸政踐奄之後也但伯禽封魯據洛誥經文周公後及惟告周公其後則在七年歸政之時

書疏廿六

一

此云即位之後有管蔡淮夷等反殊不可解史公從安國問故又用伏生所傳今文故說有岐異後漢書東夷傳云康王之時肅慎復至後徐戎僭號乃率九夷以伐宗周西至河上穆王畏其方熾乃分東方諸侯命徐偃王之征之此疑今文說則魯公征徐戎在穆王時故編篇于顧命後呂刑前也曾子問云子夏問曰三年之喪卒哭金革之事無辟也者禮與初有司與孔子曰吾聞諸老聃昔者魯公伯禽有為為之也注云伯禽周公子封于魯有徐戎作難喪卒哭而征之急王事也征之作費誓疏云伯禽所遭是母喪則在周公未歿之時云伐之於盼者盼與費聲相近即今山東費縣地也春秋左氏隱元年傳云費伯率師城郎後為季氏邑僖元年傳公賜季氏汶陽之田及費是也亦即南武城孟子云曾子居武城有越寇蓋費地在曲阜東南又通沂州府與淮沂連界故淮徐之國時為魯難魯公出師至此作誓也史記集解云徐廣曰一作鮮一作獮索隱云尚書大傳作鮮誓說文萊云惡米也周書有萊誓惡米之訓與此無涉鄭注周禮雍氏及曾子問皆引作萊今曾子問注

作費案釋文可證為後人改也許氏蓋存孔壁古文耳  
書堯典疏云孔以費誓在文侯之命後第九十九鄭以  
為在呂刑前第九文與費誓同十七今從鄭本

公曰嗟人無譁注鄭康成曰人謂軍之士眾及費地之

民聽命徂茲疏嗟者釋詁云咨嗟也嗟即說文訾字譁

也釋詁云徂往也茲此也魯公咨告軍民以者一切經音義四引三蒼云言語譎譎無費詳聽我教命往此費地鄭注見書疏 淮夷徐戎

並興疏淮夷者詩傳云東國在淮浦而夷行也徐者說

十九年楚伐我取徐州集解引徐廣曰徐州在魯東今

薛縣郡國志云魯國薛縣六國時曰徐州案淮夷毛氏

以為東國之有夷行者則此徐戎亦徐人之好與戎者

故名之非必戎夷也後漢書東夷傳則云徐戎率九夷

以伐宗周西至河上段氏玉裁云魯東近邾故曰東邾不關善敎乃甲冑注史遷敎

作陳敵乃干無敢不弔注史遷弔作善鄭康成曰敎謂

穿徹之敵猶繫也弔至猶善也疏敎者說文云擇也引

者書疏引世本云杼作甲宋仲子云少康子杼也弔者

說文云兜鍪也兜鍪首鎧也敵者說文云繫連也引周

書曰敵乃干讀若矯弔者說文作通云至也史公敎作

陳者說文訓穀為擇夏小正云陳筋革者省兵甲也省

亦擇也弔作善者與鄭同鄭注見書疏云敎謂穿徹之

者考工記函人職云犀甲七屬兕甲六屬合甲五屬注  
云屬謂上旅下旅札續之數又韞人職云察其線欲其  
臧也注杜子春云線謂縫革之縷說文司馬法韞革  
是甲冑之革必以線縷縫綴之鄭云穿徹即謂是也云  
敵猶繫者與說文繫連之訓同云弔至釋詁文云猶善  
者以下文無敢不善知之案經云弔亦可訓至下云善  
不必同訓作善說文以簡為釋言簡擇其甲冑繫連其  
干盾無敢備乃弓矢鍛乃戈矛礪乃鋒刃無敢不善疏  
不至軍所

書疏廿六

備與菑同說文云具也鍛者廣雅釋詁云椎也礪俗字當爲厲詩公劉云取厲取鍛傳云鍛石也箋云鍛石所以爲鍛質也取厲鍛斤斧之石可以利器用鋒者鑿省字說文鑿兵耑也春秋左氏昭十二年傳云磨厲以須

今惟淫舍牯牛馬注鄭康成曰牯爲桎牯之牯施牯于牛馬之腳使不得走失杜乃獲注鄭康成曰山林之田

春始穿地爲穿或設獲其中以遮獸獲柞鄂也杜一作

數斂乃穿無敢傷牯牯之傷汝則有常刑說淫者釋詁云大也舍

者郭注釋詁云放置也牯者說文云牯牛馬牢也引周書曰今惟牯牛馬無淫舍二字杜說文作斂云閉也讀

若杜獲一曰布獲也穿說文爲阱重文云阱陷也斂說文云塞也引此文周禮具氏掌爲阱獲以攻猛獸檻以

捕虎豹穿以捕小獸言今大放舍牢中牛馬宜杜塞穿獲以放牧之亦無久牯以傷其牲畜傷之則有常法鄭

書疏廿六

三

注見書疏云牯爲桎牯之措施牯于牛馬之脚使不得走失者易大畜六四童牛之牯鄭注云巽爲木互體震震爲牛之足足在艮體之中艮爲手持木以就足是施牯又鄭志於剛問大畜六四注云云蒙初六注云云不審桎牯手足定有別否荅曰牛無手以前足當之牛既如此馬亦可知故云施牯于牛馬之脚使不得走失失與佚通也案軍行以牛載輜重馬駕兵車常駕不舍力不能任故放置之而以橫木閉之說文云告牛觸人角著橫木所以告人也又云衡牛觸橫大木其角詩曰設其福衡據此則牯謂閉之以木鄭云牯其脚亦此意也云山林之田春始穿地爲穿或設獲其中以遮獸獲柞鄂者周禮雍氏云春令爲阱獲溝瀆之利于民者秋令塞阱獲注云阱穿地爲塹所以禦禽獸其或超踰則陷焉世謂之陷阱獲柞弔也堅地阱淺則設柞弔于其中秋而杜塞阱獲收刈之時爲其陷害人也書棗誓曰斂乃獲斂乃阱時秋也魯語云鳥獸成設穿鄂注云鄂柞格所以誤馬牛其風臣妾逋逃注鄭康成曰風走逸臣獸是也

妾厮役之屬也

**疏**

風者春秋左氏僖四年傳云惟是風相誘謂之風臣妾者古軍中有丁女墨子備城門篇云

守法五十步丈夫十人丁女二十人老小十人計之五十步四十人周禮太宰九職八日臣妾聚斂疏材書疏云古人或以婦女從軍是也通者說文云亡也鄭注見史記集解云風走逸者春秋左氏僖廿八年傳晉中軍風于澤杜注云牛馬因風而走皆失之是也云臣妾厮役之屬者公羊宣十二年傳云楚伐鄭厮役扈養死者數百人何氏注云艾草為防者曰厮汲水漿者曰役養馬者曰扈炊烹者曰養古者兵車一乘甲士三人步卒七十二人外有餘子二十五人即厮役也 勿敢

越逐祗復之

**注**

史遷祗作敬一作振我商賚汝乃越逐

不復汝則有常刑

**疏**

說文云越逾也逐追也祗者釋詁云敬也商釋文云徐音章鄭注土

冠禮云章明也賚者釋詁云賜也言馬牛臣妾有逸逃者勿逾次追之以致失律有得之者能敬復其主我明

書疏廿六

四

賜汝汝逾次追逐及得之不返者皆有罪罰史公祗作敬者釋詁文集解引徐廣曰敬一作振祗振聲之輕重

臯陶謨祗敬六無敢寇攘**注**鄭康成曰寇劫取也因其德史記作振敬

亡失曰攘踰垣牆竊馬牛誘臣妾汝則有常刑

**疏**

寇者

舜典云強取為寇攘者論語其父攘羊周氏注云有因而盜曰攘釋詁云攘因也攘俗字誘者鄭注樂記云引

也廣雅釋言云差致也鄭注見史記集解 甲戌我惟征徐戎峙乃糗糧**注**史

遷乃作爾糗糧一作餼糗無敢不逮汝則有大刑**注**馬

融曰大刑死刑

**疏**

時从止俗誤从山釋詁云時其也糗者說文云熬米麥也逮者釋詁云逮

及與也糗一作餼者說文云餼乾食也周書曰峙乃餼糗案說文無糗字疑當為糧以糗為餼者說文云養餼也陳楚之間相謁食麥飯曰糗是糗為熬米稷麥乾而食之義得通也詩伐木云乾餼以愆史公汝作爾者爾

汝通字馬注見史記集解以大 魯人三郊三遂注史遷

刑為死刑者死刑大辟是也

遂作隧大傳說古者百里之國三十里之遂二十里之

郊七十里之國二十里之遂九里之郊五十里之國九

里之遂三里之郊疏言四江氏聲用其說非也郊者釋

地云邑外謂之郊鄭注王制云郊鄉界之外者也遂者

鄭注王制云遠郊之外曰遂周禮夏官大司馬云凡制

軍大國三軍魯是大國宜為三軍小司徒疏云凡出軍

之法先六鄉賦不止次出六遂賦猶不止徵兵于公邑

及三等采賦猶不止乃徵兵于諸侯大國三軍次國二

軍小國一軍此軍等皆出于鄉遂賦猶不止則諸侯有

徧境之法則千乘之賦是也春秋左氏成元年疏云天

子六軍出自六鄉大國三軍出自三鄉其餘公邑采地

之民不在三軍之數古者用兵天子先用鄉鄉不足取

遂遂不足取公卿采邑及諸侯邦國若諸侯出兵先盡

三鄉三遂鄉遂不足然後總徵境內之兵今此淮夷徐

戎兩寇並發其勢甚急故悉起鄉遂之兵應之然猶不

至總徵境內也史公遂作隧者隧卽闕省文大傳說見

王制疏引尚書傳云多士傳周禮典疏云毋逸傳皆誤

書疏廿六

引也魯國百里則郊當在二時乃楨榦注馬融曰楨榦

十里之外遂又在其外也

皆築具楨在前榦在兩旁甲戌我惟築無敢不供疏植

釋詁云榦也舍人注云楨正也築牆所立兩木也榦所

以當牆兩邊障土者說文云榦築牆耑木也築牆也馬

注見史記集解云楨在前榦在兩旁者凡築牆及城必

立木兩旁以繩束板又置木于其兩首乃取土實築之

是楨為兩首之木榦則兩旁之木也說文云築牆耑木義亦同汝則有無餘刑非殺注

鄭康成曰無餘刑非殺者謂盡奴其妻子不遺其種類

在軍使給廝役反則入于罪隸春槩不殺之疏鄭注見

書疏云

盡奴其妻子不遺其種類者以無餘刑故言盡奴不遺也云在軍使給廨役反則入于罪隸春槩者周禮司厲職云其奴男子入于罪隸女子入于春槩注鄭可農云謂坐爲盜賊而爲奴者輸于罪隸春人槩人之官也周禮又云凡七十者與未亂者不爲奴則此無餘刑亦有不爲奴之人言其大畧耳云不殺之者不供楨榦法無死

刑魯人三郊三遂時乃芻芟無敢不多注史遷多作及

鄭康成曰芟乾芻也汝則有大刑疏芻芟者說文云芻川艸也芟乾芻史

公作時乃芻芟糗糧楨榦無敢不逮我甲戌築而征徐戎無敢不及有大刑則此不及蓋不多之異文也芻芟不至牛馬不得食不可以戰故有大刑若及而不多不應云大刑也當從史記多字與及相似而誤鄭注見書疏

書疏廿六

六

光緒甲申小春  
月白堤八字橋  
孫谿槐廬家塾

光緒歲在闕逢涓灘國子監肄業生吳縣朱記榮校刊

費誓第廿六終

呂刑第廿七上 周書六 尚書今古文注疏卷廿七

賜進士及第授通奉大夫山東督糧道加三級孫星衍撰

**注**史遷說甫侯言於王作修刑辟又說命曰甫刑鄭康

成曰周穆王以甫侯為相 **疏**史公呂作甫者禮記引此

詩崧高云生甫及申傳云堯之時姜氏為四伯掌獄之

祀述諸侯之職於周則有甫有申有齊有許也俱以呂

為甫惟墨子引呂刑韋昭注周語云謂周穆王之相甫

侯所作呂刑也則自漢魏已前書文俱作呂刑書疏云

揚之水平王之詩云不與我戎甫明子孫改封為甫侯

穆王時未有甫名稱甫刑者後人以子孫國號名之猶

叔虞初封唐子孫封晉而史記稱晉世家其呂之所在

則齊太公世家集解徐廣曰呂在南陽宛縣西郊云言

於王者見下呂命王疏鄭注見史記集解書

疏云引書說謂書緯刑德放篇有此言也

**書疏**廿七上 一

惟呂命王 **注**史遷作甫侯言于王鄭康成曰呂侯受王

命入為三公 **疏**史公以命王為言于王者鄭注緇衣云

上屬也鄭注見書疏云呂侯入為三公者史記集解又

引鄭注云為相大傳云天子三公司徒公司馬公司空

公鄭注云一公兼二卿舉下以為稱是呂侯于六卿為

司寇于三公為司空公也以諸侯而為王朝之卿故言

入為三公是輔相之臣 **注**老一作眊 **疏**

故引書說呂侯為相也 **注**老一作眊 **疏**

享國百年者論衡氣壽篇云周穆王享國百年并未享

國之時皆出百三十四十歲矣此今文說也周本紀云

穆王即位春秋已五十矣又云穆王立五十五年崩是

百年兼數未即位之年古文說也列子周穆王篇云穆

王幾神人哉能窮當身之樂猶百年乃徂俱從生年數

之不知王充說何據耄者曲禮曰九十曰耄注云耄昏

忘也似非也耄是九十之名猶百年曰期頤不必引春

秋傳謂老將知耄又及之荒者詩傳云治也言耄而治

事此古文以爲告王之詞。耄釋文云本亦作藁。藁卽說文藁之譌。字漢書刑法志作眊。荒鄭注周禮大司寇職引書曰王旄荒。周禮釋文作旄。孔氏正義本作耄。羣經音辨引書王旄荒云鄭康成讀旄卽旄字。度作

刑以詰四方

**注**

大傳度作鮮。度馬融曰度法度也。刑一

作詳刑詰一作詰

**疏**

大傳度作鮮。度者釋詁云鮮善也。漢書刑法志云度時作刑詩傳云

時善也。則今文鮮度度時俱言度善也。或以度時爲相度時宜非也。史記以命王爲言於王則享國二語是告王之詞。呂侯告王言王享國日久老而治事當度善作刑以謹四方也。刑作詳刑者周禮大司寇引有詳字。疏云謂周穆王年老耄亂荒忽猶能用賢量度詳審之刑以詰謹四方。案以荒爲荒忽亦似非也。詰作詰今文尙書也。馬注見釋文云度法度者說文云度法制也。詰者周禮太宰職云刑典以詰邦國。注以詰爲禁。大司寇云佐王刑邦國。詰四方。注以詰爲謹。俱引此經以證。又布憲職云憲邦國之刑禁以詰四方。注云詰謹也使四方

書疏廿七上

二

謹行之則此詰四方。鄭義與之同也。王曰若古有訓。蚩尤惟始作亂。延及

于平民。罔不寇賊。注馬融曰蚩尤少昊之末九黎君名

鄭康成曰蚩尤霸天下黃帝所伐者學蚩尤爲此者九

黎之君在少昊之代也

**疏**

蚩尤者周書嘗麥解云昔天之初命赤帝分正二卿命蚩

尤于宇少昊以臨四方。蚩尤乃逐帝爭于涿鹿之阿。九隅無遺。赤帝大懼乃說于黃帝執蚩尤殺之于中冀。用名之曰絕轡之野。史記五帝本紀云神農氏世衰諸侯相侵伐。蚩尤最爲暴莫能伐。又云蚩尤作亂不用帝命。黃帝乃徵師諸侯與蚩尤戰于涿鹿之野。遂禽殺蚩尤。而諸侯咸尊軒轅爲天子。代神農氏是爲黃帝。大戴禮用兵篇子曰蚩尤庶人之貪者也。案孔子三朝記以蚩尤爲庶人者蓋上古或諸侯相侵伐。惟蚩尤以庶人作亂犯上。史記正義引龍魚河圖云黃帝攝政有蚩尤兄弟八十一人。並獸身人語。銅鐵額食沙造五兵仗刀戟。

大弩威振天下誅殺無道萬民欲命云云夫云兄弟八  
十一人必非天子諸侯是庶人之作亂者始于蚩尤民  
效之以爲寇盜故云延及平民延者釋詁云引也平者  
詩箋云齊等也則平民謂齊民也然則史記集解引應  
劭曰蚩尤古天子傳記或言諸侯或言霸天下皆由庶  
人僭位言之孔子說不誤也馬注見釋文云蚩尤九黎  
君名者高誘注國策同韋昭注楚語云九黎黎氏九人  
書疏引韋注下云蚩尤之徒也是後民之效蚩尤爲亂  
者鄭注見書疏云霸天下蓋言其竊霸號也云學蚩尤  
爲此者九黎之君在少昊之代據楚語及少皞之衰也  
九黎亂德而言也然則九黎九人亦鴟義姦宄注馬融  
黎民之作亂者寇鈔賊害見前疏

曰鴟輕也鄭康成曰盜賊狀如鴟梟掠良善劫奪人

鴟一作消宄一作軌疏鴟義舊解均失之王氏念孫曰

義者傾表反側也說文云俄行頌也詩箋云俄頃貌廣  
雅釋詁云俄衰也古者俄義同聲或訓義爲仁義字非

書疏廿七上

三

也姦宄見堯典疏馬注見釋文云鴟輕者廣雅釋詁云  
蚩輕也鴟與蚩聲相近鄭注見書疏云狀如鴟梟者御  
覽引馬融周禮注云鴟鴞惡聲之鳥也云鈔掠良善者鄭  
鴟梟惡鳥廣雅釋鳥云鴟鴞怪鳥也云鈔掠良善者鄭  
以善訓義也潛夫論述赦篇云古者唯始受命之君承  
大亂之後被前王之惡其民乃並爲敵讎罔不寇賊消  
義姦宄奪攘是說此經之義或爲滅義善而干軌法也  
釋詁云消滅也則消義姦軌或爲滅義善而干軌法也  
究周禮司刑疏引作軌或鄭本如此既訓鴟義  
爲鈔掠良善則鄭于姦軌亦爲干犯軌法也

虔注鄭康成曰有因而盜曰攘矯虔謂撓擾春秋傳虔

劉我邊陲謂劫奪人物以相撓擾也奪一作攷矯一作

橋疏奪攘見前疏矯虔者漢書注孟康曰虔固也橋稱

爲矯強取爲虔一切經音義十二云橋擅也假詐也案  
擅也出說文方言云秦晉之北鄙燕之北郊翟縣之郊

謂賊爲虔杜注左傳云虔劉皆殺也鄭注見周禮司刑疏云有因而盜曰攘者釋詁云攘因也云矯虔謂撓擾者矯與撓聲相近引春秋傳者成十二年傳文奪說文作斂云彊取也引周書此文矯周禮司刑注作橋苗民弗用靈制以刑惟作五虐之刑曰法殺戮無辜注鄭康成曰苗民謂九黎之君也九黎之君于少昊氏衰而棄善道上效蚩尤重刑必變九黎言苗民者有苗九黎之後顓頊代少昊誅九黎分流其子孫居于西裔者爲三苗至高辛之衰又復九黎之惡堯興又誅之堯末又在朝舜臣堯又寂之禹攝位又在洞庭逆命禹又誅之穆王惡此族三生凶惡故著其氏而謂之民民者冥也

書疏廿七上

四

言未見仁道弗一作匪一作否靈一作命一作練虐一

作殺

緇衣引甫刑弗作匪靈作命注云匪非也命謂政令也高辛氏之末諸侯有三苗者作亂其治

民不用政令專制御之以嚴刑乃作五虐蚩尤之刑以是爲法案詩箋云靈善也與令通義弗用靈當是弗用善以治姦民卽下文云報虐以威也墨子尚同中篇云昔者聖王制爲五刑以治天下逮至有苗之制五刑以亂天下則此豈刑不善哉用刑則不善也是以先王之書呂刑道之曰苗民否用練折以刑惟作五殺之刑曰法則此言善用刑者以治民不善用刑者以五殺靈字緇衣作命墨子作練聲俱相近制折匪否不亦聲相近虐殺義相同也鄭義具緇衣注不復釋之鄭注見書疏云苗民謂九黎之君者謂當顓頊之時三苗之先世九黎之君也云九黎之君于少昊氏衰而棄善道者楚語云少昊之衰也九黎亂德是也云有苗九黎之後者楚語云其後三苗復九黎之德注云三苗九黎之後者高辛氏衰苗爲亂行其凶德如九黎之爲也云顓頊代少

吳誅九黎分流其子孫者楚語云顛頊受之是代少昊也下云遏絕苗民無世在下是分流其子孫也云高辛氏衰又復九黎之君堯興又誅之者楚語注亦云堯興而誅之云堯末又在朝舜承堯又敷之者堯典云竄三苗于三危是也云後禹攝位又在洞庭逆命禹又誅之者檀弓云舜葬蒼梧之野注云舜征三苗而死因留葬焉墨子兼愛篇引禹誓曰蠢茲有苗用天之罰若予既率爾羣對諸羣以征有苗此禹誅有苗之證也云民者冥也者孝經援神契文賈誼新書大政篇云民之言冥也萌之言盲也云故著其惡繼衣疏引鄭注作後王作故著

其氏爰始淫爲劓取椽黥注夏侯等書劓取劓剝爲髡

宮劓割頭庶黥鄭康成作取劓曰取斷耳劓截鼻椽謂

椽破陰黥謂羈黥人面苗民大爲此四刑者言其特深刻異于臯陶之爲注頭庶黥見書堯典疏劓取者說文

書疏廿七上

五

云劓刑鼻也重文作劓取斷耳也椽者詩名旻云昏椽靡共箋云椽椽毀陰也黥者說文云墨刑在面也重文作劓四者并大辟爲五刑也椽即敬假借字說文云敬去陰之刑也引周書別劓敬黥案五刑本有說無取則別取字之誤也夏侯等書是今文以臍當別宮當椽割頭即大辟庶黥之庶未詳案庶煑也鄭注周禮敘官庶氏云庶讀如藥煑之煑司刑注云墨黥先刻其面以墨室之墨須煑故云庶劓也鄭注見詩正月疏以劓取爲則劓者疑說文之別劓云大爲此四刑者釋詁云淫大也云其特深刻深異于臯陶之爲者唐虞象刑臯陶明之如周禮所云加明刑非必刑之也苗注越茲麗刑并制罔民深文苛刻實用之是異于古制

差有辭注鄭康成曰越于也茲此也麗施也于此施刑

并制其無罪者注越與粵同釋詁云于也茲此也麗者

以入辟麗邦瀆又鄉土云各麗其瀆以議獄訟鄭注皆云麗附也辭者說文云訟也言于此附于刑并制作五

虐之法無有差減亦無罪狀讞其可輕可緩刻深之至  
鄭注見詩正月疏云麗施者鄭注土喪禮同文亦見廣  
雅釋

民興胥漸注大傳云虐虞象刑而民不敢犯苗民

用刑而民興犯漸疏胥者釋詁云相也漸猶詐也荀子  
不苟篇云小人知則攫盜而漸正

論篇云上幽險則下漸詐矣王氏引之云楊氏注漸為  
進又為浸皆非也盤庚中云暫遇姦宄暫讀曰漸漸詐

欺也莊子胠篋篇云知詐漸毒此云民興胥漸言小民  
方興相為詐漸故下文罔申于信以覆詛盟也大傳說

見唐傳云犯漸者亦注泯泯芬芬罔中于信以覆詛盟虐  
言與詐以犯上也

惟腥注泯泯一作洎洎戮一作修方一作芻疏泯或作  
泯周禮

小宗伯注杜子春讀泯為泯周書祭公解云汝無泯泯  
芬芬孔晁云泯芬亂也紛與芬通王充論衡寒温篇云

前世用刑者蚩尤亡秦甚矣蚩尤之民洎洎紛紛亡秦  
之路赤衣比肩作洎洎蓋今文尙書也王氏多用今文

覆者詩傳云反也鄭注王制云敗也方與芻通說文云  
溥也監者釋詁云視也德者說文云升也腥當為腥說

文云胜大膏臭也論衡變動篇云甫刑曰庶修芻告無  
辜于天帝此言蚩尤之民被冤芻告無罪于上天也案

言蚩尤時民多昏亂以敗詛祝盟誓用其虐威使眾被  
戮之民溥告無罪于上天天帝視民無有馨香升聞惟

刑之發聞注腥蕞爾 皇帝哀矜庶戮之不辜報虐以威注戮一作

僂疏以一作用遏絕苗民無世在下疏此皇帝鄭以為顯

頊也論衡讖告篇云甫刑篇曰報虐用威威虐皆惡也  
用惡報惡亂莫甚焉蓋言民罔不寇賊民興胥漸既已

惡矣苗民用威報之也戮作僂以作用蓋今文遏者一  
切經音義一引蒼頡篇云遮也言顛頊哀憐眾民被戮  
之無罪疾苗民之以暴易暴因遮 乃命重黎絕地天通  
絕竄逐之無令嗣世在下土也

罔有降格羣后之逮在下明明棐常鰥寡無益注墨翟

書引羣后之逮在下十四字在有辭有苗之下德威維

威之上逮作肆棐作不無蓋作不蓋疏重黎顓頊時司注天地官名楚語

昭王問於觀射父曰周書所謂重黎實使天地不通者

何也若無然民將能登天乎對曰非此之謂也少皞之

衰也九黎亂德民神雜糅不可方物夫人作享家為巫

史無有要質民置于祀而不知其福烝享無度民神同

位民瀆齊盟無有嚴威神狎民則不綱其為嘉生不降

無物以享禍災薦臻莫盡其氣顓頊受之乃命南正重

司天以屬神命火正黎司地以屬民使復舊常無相侵

瀆是謂絕地天通其後三苗復九黎之德堯復育重黎

之後而不忘舊者使復典之以至于夏商故重黎氏世敘

天地而別其分土也釋詁云降下也格陞也逮者釋言

云遏也謂遏訟周禮禁殺戮掌遏訟者以告而誅之注

鄭司農云遏訟者遏止獄訟者也明明者釋訓云察也

書疏廿七上

七

棐者釋詁云備也蓋者高誘注淮南子云蔽也言顓頊  
命重司天黎司地使神民不同位上下分絕以禮烝享  
而通之祭則受福無有升降雜糅于羣后之遏訟在下  
者能明揚明哲之人以輔天常使鰥寡無壅蔽之情也  
墨子說見尚賢中篇文具後疏逮作肆者說文云肆極  
陳也棐常作不常者言非常明察無益作不益義同

皇帝清問下民鰥寡有辭于苗注馬融曰清問清訊也

鄭康成以皇帝哀矜庶幾之不辜至罔有降格皆說顓

頊之事乃命重黎即是命重黎之身非羲和也皇帝清

問下民以下乃說堯事顓頊與堯再誅苗民故上言遏

絕苗民云有辭于苗異代別時非一事也皇帝一作帝  
于一作有疏皇帝今文以為堯則皇者釋詁云君也魏  
志鍾繇傳繇上疏引此經說之云此言堯

當除蚩尤有苗之刑先審問於下民之有辭者也若今蔽獄之時訊問三槐九棘羣吏萬民清者鄭注玉藻云明察於事也荀子揚倅注云明審也鄭說見書疏與鍾繇說同者今文義也趙岐注孟子引甫刑皇帝作帝云謂帝爲天云天不能問民此今文歐陽夏侯異說也于苗墨子作有苗古文也

德威惟畏德明

惟明

**注**惟一作維畏一作威

**疏**表記引甫刑曰德威惟威德刑惟明非虞帝其孰能知此乎注云德所威則人皆畏之言服罪也德所

明則人皆尊之言得人也案得人謂下文三后惟作維畏作威俱

乃命三后恤功于民伯夷降典折民惟刑

**注**

大傳說伯夷降典禮折民以刑謂有禮然後有刑也馬

融曰折智也禹平水土主山川稷降播種農殖嘉穀

三后成功惟殷于民

**注**命一作名折一作哲一作制惟

書疏廿七上

八

一作維殷一作假

**疏**墨子尚賢中篇云先王之書呂刑道之曰皇帝清問下民有辭有苗

曰羣后之肆在下明明不常鰥寡不蓋德威維德明維民乃名三后恤功於民伯夷降典哲民維刑禹平水土主山川稷降播種農殖嘉穀三后成功維刑於民則此言三聖人者謹其言慎其行精其思慮索天下之隱事遺利以上事天故天鄉其德下施之萬民萬民被其利後漢書楊賜傳賜曰三后成功維殷于民臯陶不與焉蓋吝之也注云吝恥也殷盛也引此云云言臯陶不預其數者蓋恥之釋詁云后君也恤憂也功者詩傳云事也折與制聲相近陶潛四入目引折亦作制農者廣雅釋詁云勉也殖者文選藉田賦注引倉頡篇云種也嘉穀者謂稷今之小米也漢書本紀云嘉穀元稷言堯之得人乃命三君憂民之事伯夷先降下典禮使民明習而止其刑禹平水土主山川釋水云從釋地以下至九河皆禹所名也稷下布種勉民種禾大戴五帝德云使后稷播種務勤嘉穀管子大匡云耕者用力不農有罪無赦皆以農爲勉也三后成功惟民享其盛矣

舉伯夷不舉臯陶者漢書刑法志云書云伯夷降典愆民惟刑言制禮以止刑猶隄之防溢水也大傳說引孔子曰古之刑者省之今之刑者繁之其數古者有禮然後有刑是以刑省也今反是無禮而齊之以刑是以繁也書曰伯夷降典禮云云與刑法志義同馬注見釋文云馬鄭皆音愆智也者見釋文刑法志亦作愆注師古曰愆知也言伯夷下禮法以道民民習知禮然後用刑也墨子殷作假者正也言三后正民以成功也命作名者史記張耳傳亡命索隱引晉灼漢書注云命者名也是名亦命也折制聲相近墨子所用蓋古文士制

百姓千刑之中

**注**

士一作爰中一作衷

**疏**

士者堯典云臯陶作士言

三后成功而後士師制止百姓于刑之中也後漢書梁統傳統曰經又曰爰制百姓于刑之中也後漢書梁衷則人無所措手足衷之為言不輕不重之謂也王氏鳴盛云此經無臯陶下文命諸侯監伯夷播刑亦專舉伯夷不及臯陶偽孔以此篇言刑事而臯陶不見遂妄改爰為士以就其說也案士但舉刑官亦不必指臯陶也

書疏廿七上

九

也以教祗德穆穆在上明明在下灼于四方罔不惟德之勤故乃明于刑之中率乂于民裴彛

**疏**

祗者釋詁云敬也穆穆者

釋訓云美也灼者廣雅釋訓云灼灼明也率與吹同語詞也釋詁云乂治也裴備也彛常也言刑得中則民服教而敬德堯有穆穆之美在上三后明明之察在下灼見于四方無不思德之勤故乃明于刑之中正率治于民以輔

彛常也 典獄非訖于威惟訖于富敬忌罔有擇言在躬

**注**

罔有上一有而字 疏 典即敝省說文云主也說者釋

神不富傳云富福也郊特牲云富也者福也言主獄不當終于立威惟終于作福即下文一人有慶兆民賴之也表記云甫刑曰敬忌而罔有擇言在躬多而字注云忌之言戒也言已外敬而心戒慎則無有可擇之言加于身也案擇為釋假借字說文云釋敗也孝經云口無擇言身無擇行法言吾子篇云君子言也無擇聽也無

淫擇則亂淫則辟是擇與淫對下文云邪哆是也則此言敬忌而無有敗言出于身也 惟克天德

自作元命注鄭康成曰大命謂延期長久也配享在下

**命**克者說文云肩也天德謂五常之德元者易文言云善之長也命者白虎通壽命篇云人之壽也天命已使生者也配謂配天享謂享其祿言惟能肩任天德自作善命則配天命而享天祿于下矣鄭注見書疏以元為大者易曰大哉乾元九家易曰陽稱大是也云大命謂延期長久者洪範建其有極斂時五福一曰壽五日考終命也

光緒歲在閏逢涒灘國子監肄業生吳縣朱記榮校刊

書疏廿七上

十

光緒甲申小春  
月白堤八字橋  
孫谿槐廬家塾

呂刑第廿七上終

呂刑第廿七下 周書六 尚書今古文注疏卷廿七

賜進士及第授通奉大夫山東督糧道加三級孫星衍撰

王曰嗟四方司政典獄非爾惟作天牧今爾何監非時

伯夷播刑之迪注迪一作不迪疏可政典獄謂諸侯也

傳云天生民而立之君以司牧之言惟汝非為天牧民

乎今汝何所視法非是伯夷施刑之道乎繡衣引甫刑

曰播刑之不迪注云播猶施也其今爾何懲惟時苗民

不衍字耳迪道也言施刑之道匪察于獄之麗罔擇吉人觀于五刑之中惟時庶威奪

貨斷制五刑以亂無辜上帝不蠲降咎于苗注鄭康成

曰天以苗民所行腥臊不潔故下禍誅之苗民無辭于

罰乃絕厥世疏懲者鄭注表記云謂創艾蠲者詩傳云

潔也周語云明神不蠲注同咎者鄭注

大傳云極也極即誅也言汝今何所懲戒惟是苗民不

審察于獄之施不擇善人察于五刑之適中惟是衆恃

威奪貨之人任之使斷制五刑亂罰無罪天帝不潔之

下誅有苗苗民無辭以解于天罰乃絕其世嗣也鄭注

見書疏云下禍誅之者降下釋王曰嗚呼念之哉伯父

伯兄仲叔季弟幼子童孫皆聽朕言庶有格命注鄭康

成曰格登也登命謂壽考者疏王呼親戚長幼使聽我

言者深戒之穆王壽考

孫行甚多故下文亦呼嗣孫此云幼子童孫也格者方

言云正也正命謂不夭折鄭注見書疏云格登者釋詁

格登陞也格今爾罔不由慰曰勤爾罔或戒不勤注曰

登轉相注一作日疏詩傳云由用也慰安也勤者釋詁云勞也或

者詩箋云或之言有也言今汝無不用安以

謂勞汝無有戒其不勞者言貪逸以失時故下文曰俾我一日也曰字釋文人實反音日或說慰者說文云惠怒也今汝治獄無不用惠怒為勤無哀敬折獄之心也天齊于民俾我一日注馬

融俾作矜曰齊中也矜哀也于一作乎俾一作假疏後漢

書楊賜傳賜上封事曰夫善不妄來災不空發王者心有所惟意有所想雖未形顏色而五星呂之推移陰陽為其變度呂此而觀天之與人豈不符哉尚書曰天齊乎人假我一日是其明徵也注云我君也天意欲整齊

乎人必假于君也今尚書文假作俾俾使者義亦通案揚賜通尚書桓君章句即歐陽尚書則今文于作乎俾作假也馬注見釋文云齊中者釋言文俾作矜訓為哀者謂人受天地之中天必矜哀其一曰之命非終

惟終在人疏終謂考終命也言天同此視人其使有一敬刑成德則邀天之眷而永年也上文云庶有格命此終其說爾尚敬逆天命以奉我

書疏廿七下

二

一人雖畏勿畏雖休勿休惟敬五刑以成三德疏逆者

云迎也奉者說文云承也三德者洪範之正直剛克柔克也言汝庶幾敬迎天命以承我一人之戒雖勿畏勿畏之雖可休勿休之惟敬慎五刑之中以成此三德之美漢書宣帝詔曰雖休勿休祇事不怠以成三德或以

也外戚傳引書曰雖休勿休惟敬五刑以成三德或以祇事不怠為經文非也偽傳以休為美亦非王氏引之以休為喜云與畏正相反引周一人有慶兆民賴之其語云為晉休感韋注云休喜也

寧惟永疏一人天子也慶者詩傳云善也兆者鄭注內則云萬億曰兆春秋左氏閔元年傳云天子曰兆民賴者漢書高帝紀注晉灼曰利也寧者釋詁云靜也言天子有善兆民享其利寧靜可致久長也

曰吁注馬融作于曰於也來有邦有土告爾祥刑注鄭康成作詳曰審察之也邦一作國詳一作訟在今爾安

百姓何擇非人何敬非刑何度非及

**注**

史遷度作居及

作宜馬融曰度造謀也爾一作而非一作不何擇非人

上一有女字

**疏**

有國者畿外諸侯有土者畿內有采地之臣呼而告之墨子尚賢下篇云於先

王之書呂刑之書然王曰於來有國有土告女訟刑在今而安百姓女何擇言人何敬不刑何度不及能擇人而敬為刑堯舜禹湯文武之道可及也于作於者於說文同烏歎詞爾作而者鄭注聘禮云而猶女也而與爾通何擇言人言當為吉字何度非及言及前王此墨子用古文書說也潛夫論本政篇引此經而說之云將致太平者先調陰陽調陰陽者先順天心順天心者先安其人安其先者先審擇其人故國家存亡之本治亂之機在明選而已矣史公作何擇非其人何敬非其刑何居非其宜乎古宅通度義又為居見上疏及作宜者言何所處之非其義乎亦與墨子法前王之說相近馬注見釋文以呼作于說為於者與墨子同云度造謀者釋

書疏廿七下

三

詁云度謀也言何謀不可及人鄭注見後漢書劉愷傳以祥為詳云審察之者說文云詳審議也周禮太宰傳太司寇注皆引度作詳刑疏俱云詳審後漢書孝明帝紀詔曰詳刑慎罰明察單辭俱同鄭作詳也墨子作訟者或詳之誤段氏玉裁云訟公古通用謂公刑也

兩造具備注造一作遭師聽

五辭

兩造者周禮大司寇職云以兩造禁民訟注云造至也使訟者兩至具者詩傳云俱師士師周

禮刑官之屬士師下大夫四人注云士察也主察獄訟之事者聽者鄭注小宗伯云平治也五辭即五聽也周禮小司寇職以五聲聽獄訟求民情一曰辭聽二曰色聽三曰氣聽四曰耳聽五曰目聽注云觀其出言不直則煩觀其顏色不直則赧然觀其氣息不直則喘觀其聽聆不直則惑觀其眸子不直則眊然

五辭簡

孚注

史遷孚作信正于五刑五刑不簡正于五罰五罰

不服正于五過

**疏**

簡者王制云無簡不聽注云簡誠也孚者釋詁云信也正者鄭注周禮云

治也服者高誘注呂氏春秋云從也不簡謂所犯非方其誠無惡意也罰者罰鉞罰之不從則是聽獄者之過也故下文**五過之疵惟官惟反惟內惟貨惟來**注史遷究其疵

惟官已下十字作惟官惟內馬融來作求曰求有求請賊也其罪惟鈞注史遷說為閻實其罪惟鈞其過馬融

曰以此五過出入人罪與犯法者等注疵者釋詁云病也官謂挾威勢

反者孟子云惡聲至必反之謂報恩怨內謂從中制貨謂行賄賂來謂謁請惠氏棟云漢律有受賕之條即此

經惟貨也有聽請即此經惟求也案作惟來亦通史公作官獄內獄者舉其重也官獄謂貴官之獄內獄謂中

貴之獄或畏高明或投鼠忌器也閻實其罪惟鈞其過者罪實則過與犯者等虛則赦之馬注見釋文云請賕

者說文云以財物枉法相謝也案上文有貨此又云求蓋貨為勒索貨賄賕則以財干請也馬注又見史記集

書疏廿七下

四

解云以此五過出入人罪者謂枉法故出入之云罪與犯法者等者鄭注投壺云鈞等也其審克之

五刑之疑有赦五罰之疑有赦注鄭康成曰不言五過

之疑有赦者過不赦也禮記曰凡執禁以齊眾者不赦

**過**疏審者釋詁云察審也轉相訓克與核聲相近漢書刑法志元帝詔曰書不云乎其審核之即用此文

或今文克作核也核又通覈說文云覈實也考事兩笱邀遮其辭得實曰覈王制云疑獄汜與眾共之眾疑赦

之鄭注見書疏引禮記者王制文執禁齊眾謂有司所以禁民為非五過之疵枉法亂政不可赦之其審

克之簡孚有眾惟貌有稽注史遷孚作信貌作訊貌一

作緇疏簡孚有眾者即王制所云疑獄汜與眾共也言必眾誠信之貌者廣雅釋詁云治也故史記作

訊周禮小司寇以三刺斷庶民獄訟之中一曰訊羣臣二曰訊羣吏三曰訊萬民蓋欲其誠信有眾必用三訊

之法與官民共治之也稽者鄭注周禮云考合也史公  
貌作訊者詩傳云訊問也貌為治與訊義通說文作緇  
云旌絲也周書云惟緇有稽說文編字以類相從緇次  
細字緇字後則為細微必加考察之義蓋孔壁古文是  
經文之貌或無簡不聽具嚴天威注史遷聽作疑具作  
藐省文也

其疏無簡不聽與王制文同鄭注云簡誠也有其意而  
無其誠者不論以為罪具嚴天威言俱當嚴敬天

威也史公聽作疑者言無誠則非疑獄也亦不可輕  
出入罪當具嚴敬天威也具作共者釋詁云其具也

辟疑赦其罰百鍰閱實其罪注史遷墨作黥鍰作率大

傳說非事而事之出入不以道義而誦不詳之辭者其

刑墨夏侯歐陽說墨罰疑赦而罰百率古以六兩為率

古尚書說百鍰鍰者率也一率十一銖二十五分銖之

書疏廿七下

五

十三也百鍰為三斤馬融曰鍰鈔也鈔十一銖二十五

分銖之十三也賈逵說俗儒以鈔重六兩周官劔重九

鈔俗儒近是鄭康成曰鍰六兩也疏史公墨作黥者鄭

先刻其面以墨窒之鍰作率者鍰當為鈔率假借字也

見下疏闕實者簡閱當其實也其罰古用銅周禮職金

云掌受土之金罰貨罰入于司兵古以銅為兵器今所

傳戈劔皆銅也大傳說見周禮注及華嚴音義五五刑

注引大傳同不更載出典云非事而事之云云者鄭注

云非所事而事之令所不當為也案孝經云非先王之

法言不敢言非先王之法服不敢服然則今之浮屠當  
古之墨罪也夏侯歐陽說及古尚書說見周禮職金疏  
夏侯歐陽說古以六兩為率者百率則六百兩也率即  
鈔同音假借字古尚書說鍰亦為率者說文云鍰鈔也  
書曰罰百鍰又云鍰十銖二十五分之十三也案說文  
有脫字同古尚書說銖者淮南天文訓云秋分而葉定

粟定而禾熟律之以數十二故十二粟而當一粟十二粟而當一寸日之數十故十寸而爲尺十尺而爲丈其以爲量十二粟而當一分十二分而當一銖十二銖而當半兩是銖之重也云百銖爲三斤者銅三斤也馬注見釋文云鏹銖也云云者與古尚書說及說文同云俗儒以銖重六兩者馬以說今文者爲俗儒云近是者以六兩當云六兩大半兩也引周書爲証者考工記桃氏爲劍重九銖謂之上制重七銖謂之中制重五銖謂之下制注云上制重三斤十二兩中制重二斤十四兩下制重二斤一兩案三分兩之二五銖爲二斤一兩三分兩之一十六兩爲一斤則鄭意以一銖爲六兩大半兩馬氏據此而以俗儒言一銖六兩爲近是是與鄭合也考工記又有冶氏戈戟重三銖注云許叔重說文解字云銖鏹也今東萊稱或以大半兩爲鈞十鈞爲環環重六兩大半兩鏹銖似同矣則三銖爲一斤四兩疏云大半兩爲鈞者凡數言鈞者皆三分之二爲大半兩云一爲少以一兩二十四銖太者皆三分之二爲大半兩云一環者環則百六十銖用百四十四銖爲六兩餘十六銖

書疏廿七下

六

爲大半兩是鏹有六兩大半兩也鄭注見釋文云鄭及爾雅同鄭注大傳云死罪出鐵三百七十五斤亦卽六兩之說釋文云爾雅謂小爾雅也案鏹今文作率或作逸或作饌史記周本紀作率集解引徐廣曰率音刷索隱曰舊本率亦作選漢書蕭望之傳曰甫刑之罰小過放薄罪有金選之品書大傳云一饌六兩今大傳作鏹誤也

大傳說觸易君命革輿服制度姦軌盜攘傷人者其刑

剗惟倍據下文馬注云倍二百爲四百鏹則此倍百

之有差也集解引徐廣曰麗一作莖五倍曰荏葢引趙注孟子之文實非也大傳說同上

其罰倍差閱實其罪注史遷荆作贖大傳說決關梁踰

城郭而略盜者其刑贖馬融曰倍二百爲四百鏹也差

者又加四百之三分一凡五百二十三三分之一也

一作跣

**疏**荆者釋詁云刑也刑當作跣說文云明也明斷足也差者廣雅釋詁云次也史公刑作臠

與漢刑法志及大傳同蓋今文公羊襄二十九年傳疏引鄭駁異義云臠陶改臠為刑呂刑有刑周改刑為刑司刑注亦云刑斷足也周改臠作刑疏云臠本苗民虐刑咎繇改臠作刑至周改刑為刑書傳云臠者舉本名案臠者說文云剗端也云臠當續傷其剗端之骨刑及刑蓋斷足趾漢書刑法志注孟康曰刑左右趾是也同使不能行而刑輕于臠戰國時用刑深刻左傳晏子兩踊貴屨賤是傷足趾也史記孫子傳云以法刑斷其兩足太史公自序云孫子臠脚又復用苗民之刑也則今文稱臠實即古文之刑也王氏鳴盛云刑既起臠陶則肉刑虞已有非也刑起于三王時唐虞有臠名以罪履象之而已大傳云夏后氏不殺不刑亦準合臠罪至殷時始實用之故漢董仲舒對策云殷人執五刑以督姦傷肌膚以懲惡玉篇跣引書曰跣罰疑赦則唐已前本

書疏廿七下

七

作跣馬注見史記集解云倍差倍二百為四百緩又加云云者史記正義云倍中之差二百去三分一合三百三十緩二兩也案于倍之外又加太半倍也 宮辟疑赦其罰六百緩閱實其

罪注大傳說男女不以義處者其刑宮六一作五

**疏**宮者

周禮司刑注云丈夫則割其勢女子閉于宮中漢書量錯傳錯對策云除去陰刑注張晏曰宮刑也大傳說見上云男女不以義處後世謂之為姦也史記正義本一作五百緩集解引徐廣云一作六 大辟疑赦

其罰千緩閱實其罪注大傳說降畔賊劫略奪攘矯虔

者其刑死又說夏后氏不殺不刑死罪二千饌

**疏**大辟者文

王世子云其死罪則曰某之罪在大辟是即大傳之死刑也大傳說見上又云夏后不殺不刑死罪二千饌者下云禹之君民也罰弗及強而天下治一饌六兩鄭注云所出金鐵死罪出三百七十五斤用財少爾此鄭從

今文說也 墨罰之屬千劓罰之屬千剕罰之屬五百宮罰之

屬三百大辟之罰其屬二百五刑之屬三千 **注**刑一作

**型** **疏** 周禮司刑職云掌五刑之灋以麗萬民之罪墨罪

五百劓罪五百宮罪五百剕罪五百殺罪五百五

又有增損條目孝經孔子曰五刑之屬三千蓋据周律

言之江氏聲云墨則倍于其初宮與大辟皆減焉以是

差之輕于周禮矣此穆王詳刑之意也案罪之條目必

有定數者恐後世妄加之故律所無輒比附以定罪今

例猶云比照某律也律則古今不易例則繁輒刪除之

今令甲猶然刑作型者 **上下比罪無僭亂辭** **疏** 上下文

見隸釋引三體石經 上下比罪無僭亂辭 **疏** 上下文

之適輕適重也比者王制云凡聽五刑必察小大之比

以成之注云小大猶輕重已行故事曰比周禮大司寇

凡庶民之獄訟以邦成比之注云邦成謂若今時決事

比也疏云邦成是舊法成事品式若今律其斷事皆依

書疏廿七下

八

舊事斷之其無條取比類以決之僭者詩傳云差也辭  
者說文云訟也漢書路溫舒傳溫舒上書曰囚人不勝  
痛則飾辭以視之吏治者利其然則指道以明之上奏  
畏却則鍛鍊而周內之又刑法志云姦吏因緣為市所  
欲活則傳生議所欲陷則予死比是差亂囚辭及決獄  
之辭也言上下之罪律有成事及條目所無比附而行  
之勿增其條于三千之外囚之訟辭 **勿用不行惟察惟**  
**及決獄之辭勿有差亂以失其實也** **勿用不行惟察惟**  
**法** **疏** 不行者謂蠲除之法晉書刑法志引春秋保乾圖  
**疏** 曰王者三百年一蠲法已蠲罰又行之則刑罰不  
信民無所措手足惟察惟法謂 **其審克之上刑適輕下**  
惟以明察惟用今時之法也

**服下刑適重上服輕重諸罰有權** **注** 適俱作挾 **疏** 適者

云過也過謂罪過服與良通說文云治也權者公羊桓

十一年傳云反于經然後有善者也言當服上刑者其  
過輕當以下刑治之下刑過重以上刑治之下服減等  
也上服加等也輕重諸罰有權宜也後漢書劉般傳劉

愷引尚書曰上刑挾輕下刑挾重說之云如今使臧吏  
禁錮子孫以輕從重懼及善人非先王詳刑之義也注  
云今尚書呂刑篇曰上刑適輕下服下刑適重上服謂  
二罪俱發原其本情須有虧滅故言適輕適重此言挾  
輕挾重意亦不殊與今尚書不同耳書疏云劉君以上  
刑適輕下刑適重皆為一人有二罪上刑適重者若今  
律重罪應贖輕罪應居作官當者以居作官當為重是  
為上刑適輕下刑適重者若二者俱是贓罪罪從重科  
輕贓亦備是為輕并數也疏稱劉君即是劉愷蓋今文說也  
盛云不知是悼是炫蓋偶有不照耳劉愷蓋今文說也

刑罰世輕世重

**注**

世一作時

**疏**

世輕謂平世世重謂亂

云掌建邦之三典一曰刑新國用輕典二曰刑平國用  
中典三曰刑亂國用重典注云新國者新辟地立君之  
國用輕法者謂其民未習于教叛逆之國用重典者以  
用中典者常行之法亂國篡弒叛逆之國用重典者以  
其化惡伐滅之又注司刑云夏刑大辟二百贖辟三百  
宮辟五百劓墨各千周則變焉所謂刑罰世輕世重者

書疏廿七下

九

也鄭意以周公制禮時殷民化紂凶德故變夏刑從重  
穆王改就夏刑鄭意必以為輕周本紀云成康之際天  
下安寧刑錯四十餘年不用是平國宜用中典也荀子  
正論篇云故治則刑重亂則刑輕犯治之罪固重犯亂  
之罪固輕書曰刑罰世輕世重此之謂也楊倞注云治  
世刑必行則不敢犯故重亂世刑不行則人易犯故輕  
又云治世家給人足犯法者少有犯則眾惡之罪固當  
重亂世人迫于飢寒犯法者多不可盡用重典當輕也  
案荀子所說就犯法者言之非此經義世作時  
者後漢書應劭傳劭議引書曰刑罰時輕時重  
**惟齊非**  
**齊有倫有要**  
**注** 惟一作維  
**疏** 倫者鄭注學記云理也要  
也又注小宰要會云謂計最之簿書月計曰要歲計曰  
會江氏聲云上刑適輕下刑適重非齊也輕重有權隨  
世制宜齊非齊也齊其非齊有倫理有要會荀子王制  
篇云先王制禮義以分之使有貧富貴賤之等是以相  
兼臨者是養天下之本也書曰維齊非齊此之謂也惟  
作維者今文凡惟皆从糸與思惟有別後人亂之以貧

富貴賤爲非齊者斷章取義非說此經也罰懲非死人極于病疏懲者鄭注表記云謂

創又極與勳聲相近文選北征賦注引說文勳一曰甚也言罰者謂五刑之四及罰鍰也罰所以懲創之非欲

其死而人已苦于病矣言當深慎斷者不可以復續也王應麟藝文志考云漢世諸儒所引尚書異字曰罰懲

非死佞極于病或今文尚書今未檢得所出書故不以爲注非佞折獄惟良折獄罔

非在中察辭于差非從惟從注大傳說君子之於人也

有其語也無不聽者皇于獄訟乎必盡其辭矣聽獄者

或從其情或從其辭疏佞者孔安國注論語云口才也良者詩傳云善也差者杜預注

左傳云差池不齊一言折獄者口才辯給之人能使囚窮于辭容有辭屈而枉入刑者故非口才可以折獄惟

善人折獄公正不偏無不得中也折獄者又當察囚辭之有參差不齊者以求其情既得其情非從其辭惟從

書疏廿七下

十

其辭不失其情故謂之爰書爰者易也易其文不易其辭大傳云皇于獄訟皇與況通今文皇多作況見無逸

疏云或從其情或從其辭亦釋非從惟從也徐幹中論賞罰篇云賞罰不可以數不可以重亦不可以輕先王思中以平之而不失

其節書曰罔非在中察辭於差哀敬折獄注大傳說

子曰古之聽民者察貧窮哀孤獨矜寬宥老幼不肖無

告有過必赦小罪勿增大罪勿彙老弱不受刑有過不

受罰故老而受刑謂之悖弱而受刑謂之尅不赦有過

謂之賊逆率過以小謂之桀故與其殺不辜寧失有罪

與其增以有罪寧失過以有赦又說子曰聽訟雖得其

指必哀矜之死者不可復生斷者不可復續也書曰哀

矜哲獄

敬與矜聲相近今文作矜哲即折假音字漢書千定國傳贊曰千定國父子哀鰥哲獄是

亦今文注應劭曰哲知也哀矜者傷上之失教使囚罹于罪罰也大傳說哀矜為察貧窮哀孤獨矜寬宥老幼

不肖無告洪範無虐瑩獨之指也曩者鄭注云延罪無辜曰曩剋即劬字說文云勛也勛者甚也大傳又說雖得其指必哀矜之即論語曾子云上失其道民散久矣雖得其情則哀矜而勿喜

明啓刑書胥

占戚庶中正其刑其罰其審克之

敬與啟通說文云省視也胥者釋詁

云相也占者史記平準書索隱引郭璞云自隱度也即釋言隱占注今脫自字克當為覈假借字言當明視刑

書相與占度比附之皆庶幾合獄成而孚輪而孚其刑

上備有并兩刑

輸者廣雅釋言云寫也秦策云常以同情輸楚輸猶達也上而猶能也下

而猶汝也備同荀說文云具也獄成而信乃輪寫汝信于上文王世子云獄成有司讞于公注云讞之言白也

書疏廿七下

七

則成獄當奏白于上也其刑上備者具列爰書上之勿增減其罪狀也有并兩刑者鄭注大傳云二人俱罪呂

侯之說刑也犯數罪猶以上一罪刑之言犯二罪以上止科一罪也鄭注此條雖佚亦必云然大傳注見御覽

刑法部一云犯數罪猶以上一罪刑之當作犯數罪以上猶以一罪刑之待決于王也

王曰嗚呼

敬之哉官伯族姓朕言多懼朕敬于刑有德惟刑

謂司政典獄也族姓謂伯父伯兄仲叔季弟幼子童孫也言我言詳刑多畏懼之辭者我甚敬于刑不敢妄用

也有德者當思此詳刑 今天相民 注 馬融曰相助也作配在下明

清于單辭民之亂罔不中聽獄之兩辭 相者釋詁云相助勳也單辭者後漢書光武本紀永平三年詔曰明察單辭注云單辭猶偏聽也又朱浮傳有人單辭告浮事者注云單辭謂無証據也亂者釋詁云治也言今天助民立之君使能配在下地則承天以治民聽獄可不中乎能明察

一偏之辭片言折獄其聽于獄之兩無或私家于獄之造之訟更無不中矣馬注見釋文

兩辭獄貨非寶惟府辜功報以庶尤注大傳說獄貨非

可寶也然後寶之者未能行其法者也貪人之寶受人

之財未有不受命以矯其上者也親下以矯其上者未

有能其功者也疏私者說文云自營謂之公家讀如檀

弓君子不家于喪之家府者春秋左

氏昭十二年傳云吾不為怨府注云怨禍之聚釋詁云

辜罪也功者詩傳云事也庶眾也尤與詘同說文云罪

也引周書此文言無或自營而成家子獄也以獄聚貨

不足寶也惟聚罪事天將報以眾罪也大傳云夫有不

受命以矯其上者今文讀府為誣聲相近也字亦或作

誣周語云其刑矯誣注云以詐用法曰矯加謀無罪曰

誣受人之財則親下以矯誣其上也以辜功為未有能

其功者漢書律歷志注孟康曰辜必也一切經音義引

書疏廿七下

三

漢書音義云辜固也謂規固販鬻以求永畏惟罰注大

利也則辜功謂取必規固以求功也

傳說是故聽民之術怒必畏畏思意小罪勿兼疏大傳

必畏鄭注云怒責也責囚之罪必思意兼謂非天不中

思其辭思其主思重大罪求可以出之罪也

惟人在命疏言非天之降罰不中正也惟人受天罰不

極庶民罔有令政在于天下疏天罰者猶臯陶謨云天

天罰極者詩傳云中也令者釋詁云善也洪範云王建

其有極謂王者承天建中又云庶民于汝極馬氏注云

衆民于汝取中以歸心也王罰王曰嗚呼嗣孫今往

不中則衆民無有善政在天下矣

何監非德于民之中尚明聽之哉疏言嗣孫者詔諸侯

今以往何所監視非當立德哲人惟刑疏吳志步騭傳

于民之中乎庶幾免聽之哉

罰哲人維刑書傳所美自今蔽獄都下則宜顧雍武昌則陸遜潘濬平心專意務在得情言當擇哲人任之以刑無疆之辭屬于五極咸中有慶疏疆者詩傳云竟也猶合也辭者說文云訟也五極謂五刑之中慶者詩傳云善也言惟此哲人于無竟之訟能審詳反復使合于五刑之中皆中受王嘉師監于茲詳刑疏釋詁云嘉善則有善慶矣受王之善眾而治之當視此哲人之詳刑也

光緒歲在閏逢涒灘國子監肄業生吳縣朱記榮校刊

書疏廿七下

三

光緒甲申小春  
月白堤八字橋  
孫谿槐廬家塾

